



كاليفورنيوم

C A L I F O R N I U M

رواية

لينا بسيونى

الفصل الثانی عشر " أنت المظلم "



أزیک یازمیلی فاکرنی !!!؟
أنا منصور البواب, الأستاذ بکر المحامی شغلنی فی قصر الدوسری علشان أراقب صمد
الدوسری وأنقله کل أخباره.

الحوار بدأ لما نادالی صمد فی يوم وقالی أشیل الطبق , اللى كان قیصر بیأكله فیہ العضم زى
الکلب , جیت وشیلت الطبق ومشیت شویه لقیته بیندهلی تانى وبيقولی:

خد الكرسى ده كمان وارميه فى أى داهيه!!!

وشاورلى على الكرسى الخشب المخروم.

فرجعت تانى علشان أشيل الكرسى , فلقيته تقيل أوى لدرجه أنى مقدرتش أزيحه حتى من مكانه.

فقلت لصمد:

الكرسى تقيل أوى يازميلي , ماتيجى تشيله معايا..

قالى:

شوف حد يشيله معاك يامنصور متقرفنيش!!!

فروحت للكردى والطبق فى أيدي , كان واقف ومعاه 5 من رجالته , اللى كانوا رجالة القيصر.

قولتله:

أزيك يازميلي؟!!!

بصلى من فوق لتحت ومردش عليا..

فكملت كلامى وقولتله:

معلش يازميلي , ممكن تقول لحد من الرجاله يجى يشيل معايا حاجه ونطلعها بره القصر؟

بصلى بس المره دى قالى وهو بيزعق فيا:

غور ياله من هنا ...

فخذت نفسى وجريت من قدامه , ورحت للأسوانى وأبو بشله واللى زعقوا فى وشى برده!!!

فكلمت عيل صاحبى شغال قريب من المنطقة فى مخزن منظفات , كان بيعدى عليا على طول
بالتروسيكل أسمه " علولة المترمل " وسموه المترمل علشان الترامادول والبرشام اللى على
طول بيبلبعه , لدرجة أنه من كتر البرشام وشه كرمش وبقي شبه صفيحة السمنه!!

علولة المترمل بيضرب أى حاجه يشك بس أنها ممكن تعمل دماغ!!

ضرب كل أنواع المخدرات اللى ممكن تتخيلها واللى مش ممكن تتخيلها ترامادول , تامول ,
برونفكين وتركيبات دوا كحه , أمتريل بتاع الصرع, حتى حقن نلسوان!!!

قلت لعلولة يجيلى على القصر ومعاه التروسيكل علشان نشيل الكرسى على التروسيكل ونرميه
فى أى مقلب زباله.

جالى علوله بعد ماكلمته بساعه , ودخل عليا بالتروسيكل وهو بيتمطوح هوه والتروسيكل ,
كان عميان برشام مش شايف قدامه , بصيت على التروسيكل لقيته مخبوط جامد.

فقلته:

واله ياعلولة أنت عملت حادثه وأنت جاي !!؟

حرك شفایفه وكان عايز يقول حاجه بس ماطلعش صوت!!!

فهزيتيه بأیدی وأنا بقوله:

علوله , أنت فايق !!؟ بقولك أنت عملت حادثه بالتروسيكل !!؟

فقالى حبة كلام مبهم مفهمتش منهم غير جملتين بس

كله تمام وبیسمع الكلام!!!

فزقیته قدامى علشان نطلع نشیل الكرسي , مشى قدامى وهو بيتمطوح يمين وشمال , أول
مادخلنا القصر , لقيته بيقول:

أش أش أش ... أيه الحلاوه دى ياسطى منصور , أنت عايش هنا ياااد!؟

زقيته علشان يمشى ناحية الكرسي وقولته:

هكون عايش هنا أزاى يامترمل , أنا بواب !!! أكيد يعنى ببات فى أوضة البواب اللي بره !! , وبطل هرى بقى وشيل معايا.

لقيته بيقول:

أنا طول عمرى وأنا بعدى من قدام القصر ده , وأسمع أن صاحبه راجل مليوندير ,الى هومعاه مليون دولار ... لا .. اللي هوه معاه مليون مليار.

قولته:

شيل معايا ياعلولة الكرسي وبطل هرى كتير.

شيلنا الكرسي بالعافيه ومشينا بيه خطوتين بالظبط , ولقيت علولة نزل الكرسي وقالى:
الكرسي ثقيل أوى ياسطى , أستنى هاخذ نفسى.

وطلع سيجاره وولعها!!!

خطف من أيده السيجاره وضربته بالشلوت وأنا بقوله:
شيل ياله بطل....

طلعنا الكرسي بره القصر وحطيناه على التروسىكل وقعدنا على الرصيف بناخذ نفسنا بالعافيه ,
لقيت علولة المترمل بيقولى:

على فكره ياسطى أنت هتركب معايا وأنا برمى الكرسي علشان أنا مش شايف قدامى , وممكن
أعمل حادثه بالتروسىكل.

قولته:

ماشى ياعلولة , على العموم مقلب الزباله جمبنا هنا مش بعيد.

وركبت معاه التروسىكل ومشينا , البرشام مخرى الواد علولة دايس على دواسة البنزين بغباوه ,
لأ وكمان مش باصص قدامه على الطريق باصص عليا وبيكلمنى!!

فى أقل من ثانيه كانت قدامنا عربيه نص نقل هتخبط فينا , لولا أنى حودت دراع التروسىكل ,
فأكلنا مطب خلانا نتقلب أحنا والتروسىكل والكرسى...

الحمد لله محصليش حاجه علشان نطيت قبل التروسىكل مايتقلب وجريت أطمى على علولة
اللى أنتظر بعيد , حاولت أقومه وسألته:

أنت كويس ياه

قالى:

زى الفل

ومشى قدامى ناحية التروسىكل وهو بيعرج , فعرفت أن البرشام مش مخرى حاسس برجله الى
بتعرج!!

وصلنا عند التروسىكل وعدلناه والحمد لله لسه شغال , روحنا ناحية الكرسى فلقينا ايد من ايدين
الكرسى اتكسرت , الايد مخرقة من جوا وواقع منها على الأرض حاجات شبه الانابيب جواها
حبوب شكل الخرز و لونها ذهبى!!!

نط الواد علولة فى الهوا وقاعد يزقق ويقول:

ذهب... ياسطى... ذهب

حطيت أيدى على بوقه وقتلته:

هششششش , شيل معايا الكرسي بسرعه على الاوضه بتاعتي اللي فى المساكن.

وشيلنا الكرسي وحطيناه فى التروسىكل وطلعناه على شارع فيصل , طلعا الكرسي فى اوضتى وقلت الباب.

وقولته:

حسك عينك تجيب سيره ياعلوله على اللي شوقته...

قالى:

عيب عليك ياسطى والله ماهقول لحد مادام الموضوع أبو قسم!

قولته:

أبو قسم يازمىلى بس نهدي شويه , عشان صمد أخو صاحب القصر لو شم خبر أنى لقيت حاجه فى الكرسي وخبيت عليه , هينفخنا أحنا الاتنين ,وصمد مش سهل يازمىلى...

قالى وهو بيشاور على عينه بصباعه:

من عينيا ياسطى..

وبص من الحته المكسوره فى الكرسي وقال:

ياسطى الكرسي كله محشى أنايبب دهب!!!

يومين عدوا على الحادثه دى ,وصمد بيشوفنى عادى قدامه ومسالنيش على الكرسي ولا حتى سألنى رميت الكرسي فين!!!

كنت واقف بسقى الزرع فى الجنينه ولقيته واقف فى التراس , وفى أيده كوباية الشاى والبيتى
فور وبيفرد ضميره , فقولت أناغشه والاغيه يمكن يسأل على الكرسى.

شاورتله وقولتله:

صباح الخير يازميلي...

شاورلى وهو بيبتسم وقالى:

صباح الخير يامنصور!!

شويه وأتلهى فى طلالى ابن أخوه ونسى الكرسى ونسينى.

لحد ما فى يوم لقيت البوليس داخل عليا , قولت لنفسى:

بس كده شكرا , هيقبضوا عليا علشان الكرسى!!

دخل عليا الطابط وانا واقف قدام القصر , كنت واقف مدى تعظيم سلام , وركبى بتخبط فى
بعضها , لقيته بيسالنى على:

صمد الدوسرى!!!

ساعتها اخدت نفسى وقولتله:

جوه ياباشا فى القصر

دخلوا دوروا عليه وقلبوا القصر وخلوا عاليه... واطيه

والدنيا أتقلبت على صمد من ساعتها , وشوفتله فيديو على النت وهو بيشتق روز بنت أخوه !!
, أسبوعين ونزل ليه فيديو وهو مثبت الأستاذ بكر المحامى بمسدس بعد مالمقه فى مكتبه
مقتول !! عرفت ساعتها أن صمد خلاص بخ...

شويه ونزل خبر القبض عليه وأتحكم عليه بالأعدام , ونزل فيديو ليه وهما بيعدموه علشان
يهدوا الناس اللي كانت بتطالب بالقصاص من صمد السفاح..

فى نفس الليله جالى علوله المترمل وخبط على باب أوضتى ,فتحت الباب
لقيته دخل الأوضه وقالى وهو فرحان:

خلاص ياسطى عدموا صمد!!

لقانى شكلى زى مايكون مضايق وزعلان.

فقالى:

مالك ياسطى أنت كنت بتعيط ولا أيه!!!؟ أوعى تكون زعلان على صمد !!ده سفاح ياسطى
وقتال قتله!!!

قولتله وصوتى محشرج:

اها زعلان على صمد أنا كنت بحب صمد , مع أنه طلع سفاح وقتال قتله بس كنت بحبه
, ومع أنه كان جلده وبخيل ,ومفيش مره أدانى مرتب أو حتى بقشيش!!

بس برده كنت بحبه معرفش ليه , فيه حاجه غريبه كانت بتربطنى بيه.

بصلى علوله بقرف وقال:

ذوق أهلك زباله فى البنى أدمين اللى بتعرفهم!!

وكمل كلامه وقال:

الله يرحمه ياسيدى كان سفاح وأبن كلب, خلىنا أحنأ فى الذهب اللى فى الكرسى, قوم معايا نطلع كل اللى فى الكرسى.

قومنا وكسرنا الكرسى وطلعنا كل الانابيب اللى فيه وحطيناهم فى شنطه سفر سودا أول ماحطيناهم فى الشنطه لقيت علوله واخذ الشنطه وعايز يطلع بيها بره الأوضه!!!

قولتله:

تعالى هنا.... رايح فين؟!

قالى:

هنطلع على الصاغه ونصرف الحاجه!!!

قولتله:

أنت عبيط يابنى, يلعن أبو البرشام اللى لحس مخك!!

وشديته قعدته على الكنبه وكملت كلامى وقلت:

أيش عرفك أن الحاجه دى ذهب, عمرك شوفت ذهب محطوط فى أنابيب زى دى قبل كده!!؟

هرش فى دماغه ومردش..

فقولتله:

الحاجه دى مش دهب , هى اكيد حاجه مهمة اوى , بس مش دهب , احنا عايزين حد يكون بيّفهم فى الحاجات اللى زى كده وناخد معانا عينه الاول , فهمت!!؟

قالى:

طيب ياسطى لو مشينا على كلامك , احنا مش عارفين الحاجه دى ايه أصلا , فمنين هنعرف نجيب حد يكون بيّفهم فيها!!؟

أول مره فى حياته يقول جمله صح وبتدى معنى , فكرت فى كلامه وسكت ماعرفتش أرد عليه..

فلقيته نط مره واحده وقالى:

تعرف ياسطى مين اللى هيجيب ارار الحاجه دى ؟

قولتله:

مين يافكيك!!؟

قالى:

كريم التركى , كريم تكنو بتاع الكومبيوتر , بيعرف أى حاجه من على النت هنوديله الحاجه وهو هيرسينا على التيته ويلخص اللمونه ويدينا الزتونه!!!

أنا أعرف كريم معرفه بس مش صاحبي زى علوله , هو عيل بنضاره كان بيّجى يشرب معانا حشيش فى أوضة الواد علوله فوق السطح , كان يفضل طول القعه يقول فى كلام عن الكومبيوتر والنت مكناش بنّفهم منه حاجه!!!

روحناله الأوضه بتاعته اللى جمب التأمين الصحى , خبطنا على الباب , ففتحلنا وأظاھر أنه كان لسه صاحى من النوم...

دخلنا الاوضه واللى كانت محشيه من جوه شاشات كومبيوتر وأجهزه مفتوحه وطالع منها سلوك كثيره !!! وطفى سجائر و بواقى أكل وأزايز بيره فاضيه!!

وفى آخر الاوضه سرير وجمبه جهاز كومبيوتر واللى كان الجهاز الوحيد اللى شغال فى الأوضه وكان متوصل بحاجات تانيه وطالع منه سلوك كثيره!!!

قعدنا على السرير جمبه , فطلع علوله حته حشيش وسجاير وبفره وقعد يلف سجاره وهو بيقول لكريم:

لامواخذه ياسطى , صحيناك من النوم؟!!!

خلص لف سيجارة الحشيش وأداها لكريم وقاله:

أنا عارف ياسطى أنك لسه صاحى وعلى لحم دماغك فخد افطر , علشان عايزك فى موضوع مهم وعايزك تبقى مصصح معايا..

خد كريم السيجاره ولعها واخذ نفسين.

وقال:

خير ياكباتن؟

فشاورلى علوله , فطلعت أنبويه من جيبى وأديتها لكريم واللى مسكها وبصلها بأستغراب

وحاول يقرى اللى مكتوب عليها بالانجليزى , شويه وقال كلمه أنجليزى مافهمناش بس

ترجمها وقال:

أشعاع!!!

فلقيت علوله بيقول وهو خايف:

ياديني أمةى يعنى أأنا كده أأنشعشعنا ياسطى!!!

مردش عليه كريم وطلع الموبايل وصور الأنوبه , ووصل الموبايل بالكمبيوتر وقال أنه
هيعمل بحث بالصور , سكت شويه ولقيته بيقول:

أنتوا جبتوا الحاجة دى منين!!?

قولتله بعصبيه:

ماتقولنا يا زميلى دى أيه أصلا!!

فلقيته قال كلمه غريبه , تقريبا كلور وفوم!!!

وقال بعدها:

الجرام منها ب27 مليون دولار!!!!!!!!!!!!!!!!!!!!!!!!!!!!

فتأنا بوقنا من الصدمه وفضلنا ساكتين شويه وبنبص لبعض.

وبعدين كريم تكنو قال:

هو أنتوا معاكم كتير من البتاعه دى!!?

لقت علوله بيقوله وهو بيتنطط من الفرحه:

بالكوم ياسطى ... عندنا بالكوم

سکت شویہ کریم وقال:

یاجدعان الموضوع ده أخطر مما تتخيلوا , انت بيقول أنه فيه صفقه أنابيب زى دى مسكوها

على حدود تركيا , وتقريبا البتاع اللي معاكم ده ليه علاقه بالصفقه دى , وده مش ذهب ولا

ألماظ هتعرفوا تصرفوه دى حاجه مهمه جدا ونادره وفيه دول كبيره بتتخناق عليهادول

.....فاهمين يعنى أيه؟!!!

فقلت لكریم:

يبقى يازمیلی نسلم الحاجه دى للحكومہ وهى تتصرف , علشان شكلها كبيره علينا أوى وأنا

خايف يازمیلی..

فلقيت علوله طلغ فيا وفي كريم وقالنا:

على جتتى الحاجه دى تتسلم للبوليس ماتتشف ياله منك ليه دول أيه.....

.....و طلغ صوت مش تمام وهوه بيكمل كلامه دول على نفسهم..

هو أحنا هنفضل طول عمرنا فقرا ولما تتفتح لينا طاقة القدر , نكش ونروح نسلمها كده

!!!!عادى!!!!

أقعد يابن الهرمه منك ليه!!!

وقال لتكنو:

تعرف تصرف الحاجه دى من غير ما حد يشم خبر؟

قاله وهو متردد:

من حيث أعرف فانا أعرف , وأعرف أصرفلك أى حاجه على الديب ويب ... النت العميق.

فقلت لكريم بأستغراب:

أيه النت العميق ده!!!

لسه هيرد عليا كريم , فسبقه علوله وقال بتقل دم وهو بيضحك:

النت العميق .. يعنى النت الغويط ياسطى

مردش عليه كريم بس قاله يلف سيجارة حشيش ويسكت

وجاوب عليا وقال:

بص يا كابتن النت العميق ده عالم تانى خالص , ومختلف تمام عن النت العادى اللي بندخل

عليه , بيبقى ليه محرك بحث تانى خالص غير جوجل , المحرك ده اسمه "التور " وبيقى

شكله عامله زى البصله علشان فكرته عامله زى البصله طبقات مشفره ومعقده جدا ومربوط

ببعضها فيخلى من الصعب جدا أختراقها أو تعقبها!!!!

بيتعمل عليه كل الصفقات المشبوهه اللي مش ممكن تخطر على بالك , أنا مره دخلت لقيت

عمليات أغتصاب وقتل بتتصور وفيه ناس بيدفعوا فلوس علشان يشوفوا الحاجات دى مباشر

!!! , ده غير بقى تجارة المخدرات و السلاح وتجارة البشر كمان!!

قولتله:

أزاي يعنى يازميلي حاجه زى كده موجوده !!!! و أزاي الناس دول متسابين كده عادى !!!؟

أصلا مين اللي عمل حاجه زى دى !!؟

ولع سيجارة الحشيش التانيه اللي لفهاله علوله , وسحب نفسيين منها وقعد يكح كثير وبعدين
قال:

البحريه الامريكيه هي اللي عملت النت العميق , علشان يوصلوا المعلومات ويعملوا اتصالات
على النت من غير ما حد يتعقب الرسائل , أو يراقب الاتصالات بتاعتهم , بس فيه عصابات
كبيره وصلت للنت العميق ده , وأستخدموه فى كل العمليات المشبوهه دى , طبعا علشان
أستحاله تتعقب اللي بيستخدمه أو تعرف مكانه!!!

قولته:

طيب والامريكان ماقلهوش ليه بعد البلاوى دى كلها!!؟

قالى:

أستحاله يعرفوا يفتلوه , الشبكة دى معقده جدا وبقي عليها عصابات كبيره , دفعت فلوس كثيره
علشان تطور النت العميق وتخلي من الأستحاله حد يفتلها أو يتعقب أى حد عليها , من الآخر
أنقلب السحر على الساحر..

قولته:

وأى حد كده ممكن يحمل البرنامج اللي عامل زى البصله ده ويدخل!!!

قالى:

أها بس تانى يوم هيلقى الداخليه عنده فى البيت , أو حد هاكر من اللي مترشقين فى النت
العميق , أخترق جهازه ونفخه!!

قولته بخوف:

الله مش أنت قلت محدش هيقدر يتعقبنا !!؟

قال:

أها لو أنت فاهم هتعدى جوه وتخلص من غير ماخذ باله , أنما لو عيل أطفخ وداخل

تجرب هتلبس لأن كل الحكومات فى العالم مراقبه أى حد فاتح المتصفح ده

قولته:

وأنت مش أطفخ وفاهم صح !!؟

قالى:

عيب عليك يا أيزي مكس ده انا كريم تكنو

قولته وأنا مقلق:

أنا خايف يازميلي !!

علوله قاعد جمبنا بيلف فى سجائر حشيش وطلع حبيتين من جيبه مش شكل بعض وبلبعهم !!

ومش معانا خالص.

قعد كريم على الكومبيوتر بتاعه وبدأ يشرحلى هو بيعمل أيه , مكنتش فاهم نص كلامه والنص

تانى أجتهدت انى أفهمه فقالى:

اول حاجه تتأكد أنك مأمّن جهازك كويس أوى وتغطى الكاميرا بتاعتك.

وشاور على لازقه طبيه !! لازقها ومغطى بيها كاميرا الكمبيوتر!!

وكمل وقال:

تانى حاجه تطلع من كل الحسابات اللى متسجله على جهازك , سواء كان فيس بوك بقى أو

أيميل أو غيره تطلع من أى حاجه ممكن تكشف انت مين , والأفضل تشيل أى متصفح عندك

سواء جوجل كروم أو غيره من جهازك وتسبب متصفح التور بس

وبعد كده تدخل على النت بس عن طريقه برنامج بيخليك كأنك فاتح جهازك من دوله تانيه

خالص!!

وبعدھا نقل الجهاز وفتحه تانى.

وخذ السيجاره من أيدي وسحب منها نفسين على ما الجهاز فتح , أول ما الجهاز فتح أدانى

السيجاره.

وقالى:

بص بقى علشان فيه تكات وحركات هنا مايعرفهاش غير كريم تكنو,

أول تفتح المتصفح اللى شبه البصله لازم تقفل خاصية الجافا من الاعدادات , لو دخلت على

موقع ولقيت الصفحه بتاعته كبيره سيبها زى ماهيه , ولو لقيت الصفحه صغيره ومش شايف

الكلام اللى فيها اوعى تكبرها, علشان هتلاقى عيل هاكر أبين حرام ناطلك فى جهازك.

قولتله:

والله مانا فاهم حاجه

قاللى:

هندخل دلوقتى على موقع عامل زى سوق كوم أسموه " ألفا باى " و هوريك اللى عليه
دخل على الموقع و فتحت بوقى من اللى شوفته , كل أنواع المخدرات والسلاح اللى ممكن
تتخيلها , وورانى الفيديوهات اللى كان بيحكلى عليها , مكنتش مصدق اللى بشوفه بعينى ناس
بتدفع لناس علشان يصوروا ناس تانيه وهيا بتتعذب أو بيغتصبوها!!!!!!

قعد يدوس على شوية زراير ويعمل حاجات وشويه وقال:

خلاص أنا رفعت الصور على موقع الفا باى , هنستنى بقى حد بيعتلنا,

أنا سميت الاكونت بأسم المعدن

فرد عليه علوله وقاله:

وياسطى الموضوع ده ياخذ وقت أد أيه ؟

فقاله كريم:

على حسب العرض والطل...

مكلمش كلمته وسمعنا صوت 3رسايل جم ورا بعض على الكومبيوتر!!!!

ترجمهم بسرعه لينا كريم وقال وهو مندهش:

فيه 3 عارضين يشتروا أى كمييه موجوده وفيه واحد بيسأل عن الكمييه وعارض مليون دولار

فى الجرام!!!!

أتنطط علوله من الفرحة ونزل سجد لرَبنا وحضنى وحضن كرىم وقعد بىوس فىنا وقاله:
ياسطى اللى موجود بالكيلو , أتفق معاهم كلهم , واللى يجى الاول يشيل ياسطى ,وعادى
ياسطى لو الجرام بمليون دولار , بس أهم حاجه اللى ينجز ويخلص فى السخان!!
بصلى كرىم ومستننى أقول حاجه بس ما أتكلمتش , وبان أنى موافق على كلام علوله
المترمل..

فأتفق مع ال3 وماقلهمش على الكميه لأننا ما كناش نعرف الكميه كام , بس قالهم أن الكميه
بالكيلو وأنه هيرد عليهم بالصور والوزن الدقيق كمان يومين.
وبالفعل يومين بالظبط وكان كرىم متفق على كل حاجه مع الثلاثه مره واحده , وأداهم معاد
تسليم بعد شهر , على مانظبط مكان نكون مآمنينه كويس و بالفعل أختارنا جراج كبير فى حته
مقطوعه فى طريق مصر السويس الصحراوى.

الجراج تبع واحد قريب علوله ,وبتركن فيه عربيات كبيره من اللى بتحمل البنزين.
يوم التسليم كلمنى علوله وكرىم وقالولى أنهم فى العربيه على الدائرى و مستننى أجيب
الشنطه وأقابلهم.

خدت فى أيدى الشنطه وجيت اطلع من الأوضه , فأفتكرت انى نسيت المفاتيح على السفره ,
حطيت الشنطه جنب الباب وروحت جبت المفاتيح وفتحت الباب , أدورت علشان أشيل الشنطه
بس أتصدمت وأتمسمرت مكانى لما لقيت واحد واقف قدام باب أوضتى!!!

لابس برنيطه وبيشرب سيجاره دخانها كان مغطى على وشه , أول ما دخان السيجاره أختفى
وبانت ملامح وشهوقعت وانا قاعد على الأرض وفضلت أزحف لورا علشان أبعد عنه

وهشيت بايدي وأنا بقول:

أنصرف ... أنصرف...

الفصل الثالث عشر

"نبوت قيصر"



خدت فى أيدى الشنطه وجيت اطلع من الأوضه , فأفكرت انى نسيت المفاتيح على السفره ,
حطيت الشنطه جنب الباب وروحت جبت المفاتيح وفتحت الباب , أدورت علشان أشيل الشنطه
بس أتصدمت وأتمسرت مكانى لما لقيت واحد واقف قدام باب أوضتى!!!
لابس برنيطه وبيشرب سيجاره دخانها كان مغطى على وشه , أول ما دخان السيجاره أختفى
وبانت ملامح وشهوقعت وانا قاعد على الأرض وفضلت أزحف لورا علشان أبعد عنه
وأنا بقول:

أنصرف ... أنصرف...

دخل الاوضه وقفل الباب وراه وقلع البرنيطه وقالى:

أزيك يامنصور ؟!!!!

هو صوته, شكله متغير بس صوته , صوت صمد!!!!

قولتله وانا مرعوب:

صمد؟!!!!!! بس أنت مت وشوفتك وأنت بتتشنق بعينى!!!!

قرب منى فبعدت عنه , فضحك وقال:

لا أنا عايش حتى شوف كده...

وأدانى أيده علشان أمسكها!!!

قربت أيدى من أيده ومسكتها , لقيته لحم ودم قدامى!!!

شدنى من أيدى وقومنى من على الأرض , بس أنا لسه مش مصدق أنه عايش وواقف قدامى!!
قعد على كرسى وفضلت متتح فيه , فلقيته بيقولى:

مش هتعملى شاي ولا أيه؟!!! وياسلام لو عندك بسكوت ولا بيتى فور تبقى برنس ياد يا منصور..

قولتله:

لا عندى شاي بس

قالى:

ماشى ياسيدى ميضرش ... أعملى كوباية شاي بس...

روحت عملت كوباية الشاي ورجعت لقيته ممدد على الكنبة.

قولتله وأنا لسه مش مصدق اللي شايفه بعينى:

طيب ازاي أنت لسه عايش؟!!!..... والنبي يازميلي فهمنى أيه اللي بيحصل قدامى دلوقتي?!!!

أخذ كوباية الشاي وشفط منها بوق وقال:

دى حكاية طويلة أوى!!! تلخيصها أنه فيه عصابة هربونى بره السجن وزيفوا موتى.

قولتله:

أزاي؟!!! هو فيه حاجة كده؟! عصابة؟! وليه!!!

قالى:

بالنسبه اذا كان فيه حاجه كده فحباب أقولك أها فيه حاجه كده وطلعوني ليه.....

قطع كلامه وخذ بوق من كوباية الشاى

وقال:

طلعوني علشان الكرسي اللي أدتهولك ترميه!!!

اتوترت شويه وبعدين مسكت نفسى

وقلتله:

كرسى؟ !!! كرسى أيه يازمىلى !!؟

فقالى وهو مضيق عينيه:

الكرسى الخشب المخروم اللي قولتلك ترميه مع الطبق أياه...

قولتله:

أها الطبق والكرسىمعلش يازمىلى مش فاكرا أصل الكلام ده من فتره كبيره أوى

يازمىلى وأنا مش فاكرا حاجه خالص عن الموضوع حتى مش فاكرا رميته فىن !!؟

قالى وهو متعصب:

أزاي يعنى مش فاكرا رميته فىن !!!؟

قولتله وأنا هادى خالص:

أها والله يازمىلى مش فاكرا , وبعدين أنا قولتلك تعالى شيله معايا وأنت مرضتتش..

قالى:

يعنى فاكِر أنى مرضتتش أشيله معاك ومش فاكِر وديته فين !!!؟

أتوترت شويه وقلت:

أها شوفت بقى , أصل أنا قلبى أسود ولسه فاكِر هالك من ساعتها..

موبايلى عمال يرِن , الواد علوله مش مبطل أتصال!!!

شرب صمد آخر بوق شأى

وقالى:

منصور أرجوك حاول تفتكر أنا حياتى مربوطه بالكِرسى ده , أفتكر رميته فين !!!؟

عملت نفسى بحاول أفتكر وشويه

وقولته:

أيوه أفتكرت !! تقريبا طلعتَه قدام القصر وفيه حد بتاع روبايبكيا عدى وخده

لقيته حط أيده على راسه من خيبة أمله وبعدين شويه وقال:

بتاع الروبايبكيا ده كان بيعدى قدام القصر كل يوم!!!؟

قولتله:

مش فاكِر والله يازمىلى !!!؟

تليفونى عمال يرِن فعملته صامت....

قالى:

يبقى من بكره يامنصور هجيك هنا ونطلع على كل بتوع الروبابكيا اللى فى منطقة القصر

ومش هنرجع الا بالكرسى ده فاهم !!؟

مديت أيدى تانى وقعدت أحسس على جسمه وأفحص فيه , عايز أتأكد اذا كان هو حقيقى صمد

ولا انا ضارب حاجه!!

قولته:

فاهم يازمىلى فاهم مش هنرجع الا بيه ... هو أنت عرفت مكانى ازاي يازمىلى !!؟

لقيته مردش عليا ولبس البرنيطه وقام وقف وحضر نفسه أنه يمشى

فقولته:

طيب أيه حكاية اللبس الغريب ده والبرنيطه دى يازمىلى؟

فقالى:

أكيد يعنى يامنصور علشان محدش يتعرف عليا... البلد كلها عارفه شكل صمد السفاح.

طلع على الباب وقبل مايفتحه , عينه غرغرت و قالى:

أنا بعزك يامنصور .. بعزك زى أبنى اللى مخلفتهوش , بعزك من اليوم اللى قيصر فيه ضربنى

و قطع ودنى , و محدش وقف معايا غيرك ,كنت هموت لولا أنك كنت بتجيبلى الاكل والشرب

والدوا ,ومش ناسيلك يوم ماوقفت قدام قيصر وجاتلك الجراه أنك تعترض على اللى كان بيعملوا

فيا , أه .. أنت ساعتها جريت لما زعقك , بس كفايه عندي أنك وقفت قصاده ومخفتش علشان كنت خايف عليا..

عيني غرغرت أنا كمان وكنت هقوله على الكلور فوم بس مسكت نفسي , لقيته بيعيط وبيحضنى جامد أوى وقعد يطبطب على كتفى لدرجه أنى حسيت كتفى هيتقلع!!!

وقال:

كنت أكثر حد واحشنى يامنصور يابنى!!!

سابنى وفتح الباب وهو بيمسح دموه فى كفه وقالى قبل مايمشى:

هجيلك الصبح الساعه 8 علشان نلف على بتوع الروبائيكيا...

هزيت راسى وقفلت الباب وراه وجريت بسرعه على الشباك اللى فى الأوضه علشان أبص عليه , لقيته راح ناحية عربيه جولف وبص يمينه وشماله وفتح العربيه وركبها , دورها ومشى ..

أستنيت لحد مالقيت عربيته خرجت من الشارع خالص وقعدت على الكرسي أخذ نفسي ومش

مصدق اللى حصل من شويه!!!

صمد طلع عايش!!!

قطع تفكيرى التليفون اللى عمال ينور ويطفى بعد ماعملته صامت , واسم علوله المترمل ظاهر

على الشاشة رديت عليه وقلت:

ألحقتى يا علولة ... صمد طلع عايش!!

.....

يابنى والله مابهلوس صمد كان عندى من شويه وسأل على الكرسي

.....

ماتشتمش بقولك!!!!

.....

يا عم هاجى والله بس أصبر ربعايه أطمئن أنه مش راجع تانى وهجيك على الدائرى

.....

أقسم بالله مابهلوس ولا ضارب حاجه وقولتك ماتشتمش يابن ال.....

وزى ماقلت ربعايه وجاى وفكك منى مش عايز تستنى أمشى ومفيش كلور فوم

.....

ربعايه زى ماقولتك مش هتأخر أتأكد بس أنه طلع بره فيصل خالص..

يلا سلام

قفلت التليفون مع علولة , وأستنيت ربعايه وخذت الشنطه السودا اللى على الباب وطلعت من

المنطقه وأنا بتلفت شمال ويمين خايف صمد يكون بيراقبنى , أطمنت أنه محدش ماشى ورايا ,

وركبت توك توك وطلعت على الدائرى.

وصلت الدائرى وأتصلت ب علولة فلقيته واقف جمب عربيه لادا وبيشاورلى.

روحته ناحية العربية وفي أيدي الشنطة.

كان قاعد على كرسى السواق كريم تكنو , قعدنا ورا أنا وعلوله ،أول ماقعدنا فى العربية لقيت

علوله

بيقولى:

أنت مصرصر حاجه ياله !!! صمد مين اللي لسه عايش !! وبتقولوا عليا أنا اللي مترمل !!؟

قولته:

أقسم بالله صمد كان معايا من نص ساعه...

فطلع صوت مش تمام , فشدت معاه وكنا هنتخانق مع بعض لولا كريم تكنو سلك ما بينا

وهو بيقول بعصبيه:

صمد مين دلوقتى !!! الساعه واحده باليل !!!أحنا فاضلنا ساعتين على معاد التسليم ولسه فى

الجيزه !! المفروض نبقى وصلنا الجراج من ساعه , علشان نبقى سابقين ومأمين كل حاجه قبل

مانبعتلهم أحداثيات المكان ونقولهم على المكان بالضبط!!!

فرد عليه علوله وهو بيزعق فيه:

طيب واقف بالعربية ليه , ماتطلع ياسطى!!

كريم زعق فيه هو كمان وقاله:

هو انا أعرف فين المكان!!!! أنت الوحيد اللي تعرف المكان فين بالضبط!!

نغز علوله كريم فى كتفه من ورا وقاله:

يا عم أطلع على طريق السويس الصحراوى الأول وبعدين هقولك فين بالظبط!!!!

قاله كريم بعصبية:

انا مش همشى من هنا غير لما أعرف أنا رايح فين بالظبط , علشان مافضلش ماشى وفى الآخر

ألاقى نفسى فى شرم الشيخ , وكمان أنت على طول مغيب وأكيد هتسوحنا فقولى دلوقتى وأنت

فايق

نغزه علوله فى كتفه تانى وقاله:

ماشى ياخويا .. أفضل ماشى فى طريق السويس , وقبل ماتوصل نفق الشهيد أحمد حمدى ب20

كيلو, حتلاقى علامة طريق صفرا , خليها فى ضهرك وخش فى الصحرا كام كيلو هتلاقى

جراج كبير , عديه بكام متر هتلاقى حته أرض صغيره متقفله داير مايدور بالكاوتش هو ده

المكان.

فقلت:

أزاي يعنى يا جدعان العربيه اللادا دى هتوصلنى السويس فى ساعتين !!! وبعدين دى هتعرف

تمشى فى الرمله!!!

فرد المترمل عليا وهو بيزعق برده:

والله يا أخويا محدش أدانى فلوس وقالى آجر عربيه شيروكى!!! دى العربيه اللى عرفت أجرها

على أد ال200 جنيهه اللى معايا وياخويا لما نبيع الكلورفوم , أبقى ساعتها أركب لامبورجىنى

زى محمد رمضان , و متخافش ياخويا العربيه مش هتمشى فى الرمله أصلا, فيه طريق صغير
متسفلت جنب علامه الصفرا بيودى للجراج على طول..

طلع كريم بالعربيه , شويه وطلع علوله برشامتين مش شبه بعض وبيلبعهم, وطلع حتة حشيش
وورقة بفره و لف سيجاره وولعها وخد نفس.....

شويه وضحك و هوبيقول:

قال صمد عايش قال!!!!

مردتش عليه

فأدانى سيجارة الحشيش فى أيدى.

وقال:

صحصوا بقى علشان أقولكم على الخطه , علشان دى دماغ صاحيه مبتتامش

حتة الارض اللى متقله زى الدايره بالكاوتش دى , ليها مدخلين بس , والمدخلين قصاد بعض,

و كل مدخل منهم ضيق و بيدخل عربيه واحده بس..

خد من ايدى سيجارة الحشيش تانى وخد نفس وقال:

كريم هيخش بظهر العربيه ويسد مدخل من الاتنين , علشان لما نسلم ونستلم ونخلع على طول

وهنقف على رجلينا عند المدخل التانى ونخلى الناس اللي جايه تاخذ الكلور فوم يدخلوا دايرة الكوتش برده بظهر عربياتهم.

خدت منه سيجارة الحشيش وقولته:

وأيه الفكره ؟!!!!

قال بعنظته وهو بيشاور بصوباعه على مخه:

علشان يافكيك لما نسلم الكلور فوم ونقبض الكاشات والفلوس , نختفى بسرعه بالعربيه ولو الجماعه اللي هياخدوه الحاجه ناوين على غدر مايلحقوش يلفوا و يجوا و رانا بالعربية بتاعتهم

..

قولته:

أنا خايف يازميلي !! ومش فاهم حاجة من اللي بتقوله!!!

وصلنا عند حته الأرض اللي متحاوطه بالكاوتش الساعه ٣ ونص , بعد المعاد بنص ساعه!!!

دخل كريم حته الارض بظهر العربيه وسد المدخل الأولانى زى مقاله علوله بعد كده نزلنا من

العربيه , أول منازل من العربيه , لفيت بعينى علشان أشوف الكاوتش اللي فوق بعضه

ومحاوطنا من كل ناحيه..

وأنا بلف بعينى حسيت كأن حد بيتحرك بس من بره الارض المتحاوطه كاوتش!!!

قولت لعلوله:

ياز ميلى تقريبا فيه حد معنا هنا!!!

قالى وهو بيضحك وبيتريق عليا:

أقسم بالله أنت ضارب حاجه ايه الدماغ دى!!!! ضاربها منين؟!!!!.... دى مخلياك

مصرصر خالص!!!! وعمال تشوف ناس ميتة وتحس بحاجات غريبه!!!

أهدى يامنصور وأتبط وبطل خوف محدش يعرف المكان ده غيرى أنا وقريبى بس.

قولتله بعصبيه:

أقسم بالله مانا ضارب حاجه وصمد عايش وبقولك فى حد هنا تانى معنا!!!!

قاللى وهو ببشاور جوه الدايه:

طيب فين الحد ده ها ؟ مفيش حد هنا!!!

مفيش غيرى أنا وأنت وكريم ... فوق بقى يابن الهرمه!!!

شدينا مع بعض وكنا هنتخانق , فجه كريم وهو ماسك موبايله وبيقول:

أنا خلاص بعنلهم أحداثيات المكان بالظبط وهما ربع ساعه وهيقوا هنا!!!

جرينا كلنا ناحية المدخل التانى المفتوح , ووقفنا عنده

شويه وشفنا عربيات جايه من بعيد أوى وبتقرب ناحيتنا...

بصيت جمبى لقيت علوله بيطلع مطوه من جيبه وبيأمن عليها وبيحطها تانى فى جيبه!!!

قولتله:

أنت بتعمل أيه؟!!!

قالى:

بأمن على المطوه علشان لو غدروا بينا!!!

قولتله:

أنا خايف يازمىلى!!!

قالى:

أثبت وبين أنك عيل شبيح وصايح لاياكلونا... فاهم؟!!!

قربت مننا ٣ عربيات , عربيتين شروكى وعربيه مصفحه من اللى بينقلوا فيها الفلوس!!!

شاورلهم علوله قبل ما يدخلوا علشان يلفوا ويدخلوا دايرة الكاوتش بظهر العربيات مش بوشها

, لقبتهم بينفذوا كلام علوله ويلفوا علشان يدخلوا بظهرهم فعلا!!

ساعتها علوله غمزلى بعينه وهو مفتخر بنفسه أنه ممشى كل حاجه زى ماخطط بالضبط

دخلوا الداييره بظهر عربياتهم , ونزل من العربيات 5 رجاله طوال وعضلات لابسين بدل

وكرفتات ومعلقين كل واحد منهم مسدس فى حزامه!!!!

وعلى ودان كل واحد سماعه , عاملين زى الحراسات الخاصه!!!

قرب مننا واحد منهم وقال:

أنتوا اللى معاكم الكاليفورنيوم؟

بص له علوله وهو نافخ نفسه ومنشف عضلاته علشان بيان أنه أضخم

وقال بصوت تخين:

اها أحنا اللي معانا الكلور فوم

وشاورلى علوله علشان اروح أجيب الشنطه السودا من العربيه , روحت أجيب الشنطه وسمعت

علوله وهو بيقول للراجل:

فين الفلوس ياسطى !!؟

جبت الشنطه من العربيه ورجعت لقيت الراجل بيشاور لعلوله على العربيه المصفحه.

وقاله:

فى العربيه اللي هناك.

فرد عليه علوله وقال:

نشوف الفلوس الأول.

فالراجل قاله:

لا ياحلو تفتحوا الشنطه الاول قدامنا ونشوف معاكم الحاجه أصلا ولا لأ , بعدها تتظمن على

الفلوس ولو عايز تاخذ مفاتيح العربيه نفسها مفيش مشكله....

فشاورلى علوله علشان أفتح الشنطه , ففتحت الشنطه وأنا أيدي بتترعش , وطلعت أمبويه

وأديتها للراجل أبو بدله.

مسك منى الأنبوبه وطلع من جيب بدلته جهاز مليون زراير زى الريموت ,بس ليه شاشه زى
الموبايل , و داس على زرار فتح الجهاز فطلع منه ليزر أحمر , عدى الجهاز على الانبويه
فالليزر الأحمر بقى أخضر!!

وقال كلمه بالإنجليزى وبعدين قال بالعربى:

تمام أدوهم الفلوس..

وشاور للى معاه يوسعوا ويفتحوا لينا طريق, فروحنا ناحية العربيه المصفحه اللى فيها الفلوس
و سيبنا الشنطه السودا على الأرض.

أول ماقربنا من العربيه المصفحه نزل السواق بتاع العربيه وطلع المفاتيح وفتح العربيه من ورا
, ودخل قدامنا صندوق العربيه المصفحه علشان يورينا اللى فيها.
فلقينا شنط صفيح زى اللى بيعبئوا بيها مكن الصراف الآلى.

نط علوله فى صندوق العربيه وفضلت انا وكريم بره.

فتح علوله شنطه من اللى موجودين , فشوفنا جواها رزم دولارات مترصصه فوق بعضها.

مسك علوله رزمه فلوس وقعد يشم فيها زى المجنون وهو بيقول:

فلوس فلوس كتبير يا اولاد الهرمه!!

مالحقناش نندهش أو نفرح زى علوله , لقينا الخمسه اللى لابسين البديل حاطين السلاح على

راسنا من ورا.

وصوت واحد منهم بيقول:

أثبت مكانك منك ليه!!!!!!

رفعت دراعاتي الأثنين وأنا ركبي بتخبط فى بعضها , وشوفت علوله اللي جوه العربيه بيرمى

رزمة الفلوس اللي فى أيده وبيرفع ايده لفوق لما لقي مسدس السواق مرفوع على راسه هو

كمان!!!

وسمعت صوت الراجل اللي كان بيكشف بالجهاز على الحاجه وهو بيقول:

خلصوا عليهم!!!!!!

سمعت صوت أجزاء المسدسات اللي على راسنا وهى بتتشدد!!!

فغمضت عيني!!!

فجأ سمعنا صوت فرقعه كبيره بره الدايره , ففتحت عيني ولقيت سحابة دخان كبيره جوه الدايره

وحوالين كل العربيات , قعدت أكح جامد , بصيت ورايا على اللي كانوا رافعين علينا السلاح

ولقيتهم هما كمان بيكحوا جامد و بيتمطوحوا وهما مدروخين

بعد ماشميت الدخان وقعت على الأرض و بدأت أهلوس.

وأنا على الأرض وقبل ما أغيب عن الوعى شوفت خيال حد معاه عصايا تخينه زى النبوت!!!

بيتحرك وسط الدخان وبينزى بالنبوت على راس كل اللي لابسين بدل وبيموتهم!!!

غبت عن الوعى شويه , وفتحت عيني.....

لقيت واقف قدامى وسط الدخان

صمد وفى أيدى نبوت قيصر!!!!



الفصل الرابع عشر

" عودة صمد "

أنا صمد الدوسرى السفاح ... واللى
مصر كلها كانت بتطالب بأعدامه....
يوم الأعدام جاللى واحد بيرنيطه وسألنى
سؤال وقاللى لو جاوبت عليه فى عشر
دقايق هعيش!!!



أجابة السؤال كانت "كرسى"

بس لاسف جاوبت بعد العشر دقايق ماخلصوا ,فسابنى ومشى ومقاليش هيعدمونى ولا لأ!!!

عدى أول يوم من غير ماحد يدخلى الزنزانه , بتمنى أن باب الزنزانه يفضل مقفول على طول ,
لانه لو أنفتح فيه أحتمال كبير يعدمونى!!!

اليوم التانى الصبح باب الزنزانه أنفتح , والراجل أبو برنيطه وقف قدام باب الزنزانه
وقتها قعدت أترجاه مايموتنيش وقلنله انى أنا بس اللى أعرف أوصله للكرسى.

فلقيته رمى عليا شطنتين بلاستيك!!!

شنته فيها بدلة لواء !!! والتانيه فيها صابونه وليفه ومقص ومكنة حلاقه!!!

وقاللى:

أستحمى وأحلق وغير هدومك , الحمام هتلاقيه آخر الطرقة على أيدك الشمال.

ومشى وساب باب الزنزانه مفتوح!!!

خدت الشنط البلاستيك , ومشيت ناحية باب الاوضه وأنا ضهرى متنى وبجر جر فى رجلي ,
طلعت بره الزنزانه , لقيت شاويش واقف بره الزنزانه , أول ماشوفته أتخضيت بس هو ماداش
أى رد فعل.

سألته على الحمام , فشاورلى عليه من غير مايتكلم

مشيت فى الطرقة و وصلت للحمام , أستحميت وحلقت ولبست بدلة اللوا وطلعت من الحمام ,

لقيت أبو برنيطه واقف مستنبنى على باب الحمام.

أول ماشافنى ببده اللواء , قاللى وهو مبتسم:

يخربيتك يا صمد شكلك لواء فعلا!!!

فأبتسمت وقولته:

هو أنتوا هتخرجونى ... صح ياباشا!!!

فقالى:

لا.... هنوديك دريم بارك .. أمشى ورايا يا صمد وهفهمك كل حاجه بعدين.

مشيت وراه وكان كل اللي بيعدي قدامهم بيدوله تعظيم سلام , عسكرى , ضابط , لواء!!!

مكنتش عارف رتبته أيه بالضبط!!!

خرجنا بره السجن , كان في عربيه بى أم سودا بسواقها واقفه قدام باب السجن مستتياها.

ركبنا جمب بعض ورا وطلع السواق على طريق أسكندريه , طول مآحنا فى الطريق

مأتكلمناش خالص!!!

وصلنا الساحل الشمالى ووقفت العربيه قدام شاليه فخم بيطل على البحر مباشرة , ومفيش جمبه

اى شاليهات تانيه!!!

السواق نزل وفتح الباب لابو برنيطه , اللي نزل من العربيه وشاورلى انزل

أبو برنيطه قال للسواق:

أطلع أنت ولما أعوزك هكلمك , السواق أداله تعظيم سلام وركب العربيه ومشى.

بعدها بصلى وقالى وهو مبتسم:

أيه رأيك فى الجو الرومانسى ده يا صمد؟!!

مردتش من صدمتى!!!, أو الكلمات تاهت من لسانى فرديت عليه بكلام غير مفهوم , فيما معناه

ربنا يسترك!!

أبو برنيطه شاب عمره مايعديش الاربعين , ملامحه حاده وعينه تحس فيها المكر والذكاء , أول

ماتشوفه بتحس بهيبته حتى لو متعرفش هو مين!!!

لوشوفت وشه مش هتعرف توصف ملامحه , بس هتفضل مطبوعه فى مخك من اول مرة

تشوفوه!!!

تحس أنهم بيختاروا الناس دى كده وشهم تشوفوه ومتعرفش توصفه بس فى نفس الوقت يفضل

ملزوق فى مخك!!

فتح الشاليه واللى كان من جوه واسع و فخم زى بره,

مطبخ أمريكانى كبير فى نص الشاليه وفي كل حته تماثيل فخمه وفاطات باين من شكلها أنها

غاليه!!!

قالى:

تلاقيك جعان يا صمد..... تاكل؟!!

قولته:

كلك زوق ياباشا هو أنت أسمك أيه ياباشا؟!!

قالى وهو مبتسم:

ماليش أسم!!!

وسكت شوية ولقيته بيضحك بصوت عالى وقالى:

ممكن تسمينى مستر أكس....

مشى ناحية المطبخ و رجع حط قدامى كيسين بلاستيك مكتوب عليهم

كبابجى الشرقاوى!!!

وقالى وهو مبتسم:

كل ياصمد كباب وكفته

كنت هموت من الجوع وكنت مريلى على الأكل ,بس كنت مكسوف أو محرج مش عارف.

فقالى وهو برده مبتسم:

أنت مكسوف ولا أيه؟!!!

وطلع الاطباق الملفوفه من الكيس ففاحت ريحة الكباب والكفته , كان هيغمى عليا.

فتح اللفه وطلع صابع كفته وأدهولى , خطفت من أيده صوباع الكفته ونزلت على الأكل , تقريبا

ساعتها أكلت 3 كيلو كباب وكفته وحبست بشفشق شاي , قومت عملته لنفسى.

معداش كام يوم و كنت خدت علي مستر أكس جامد و , كان بيعاملنى بحميمه كأنه يعرفنى من

سنين!!!

لدرجة أنى حكيتله قصتى كلها من أولها لآخرها وبكل صدق , كان مبتسم طول مانا بحكى.
مهما حاولت أستفز مشاعره وأنا بحكى , برده كان بيفضل مبتسم , الحاجه اللى خلتنى لأراديا
أخاف أكذب عليه فى حاجه , لأنى على طول كانت حاسس من أبتسامته أنه فاهمنى وقافشنى ,
مكنش محتاج نمر زى نمروسى أو كلب زى قيصر علشان يخوف اللى قدامه من أنه يكذب
عليه أو يخدعه , كان أبتسامته اللى وشه كفيله تخليك تقرر بكل حاجه!!!

بعد ما خلصت حكايتى قالى:

أنت سفاح يا صمد!!!

قولته:

كل الناس بتقول عليا سفاح , مع أنى لو كنت أتشنقت كنت هعتبر شهيد...

قالى وهو مبتسم:

شهيد؟!!!!

قولته:

أها شهيد , كل اللى قتلتهم كانوا نصابين وكانوا عايزين يسرقوا فلوسى ومالى.

وفيه حديث بيقول من مات مدافعا عن ماله فهو شهيد..

قالى:

ياسلام!!!...طيب وأخوك اللى قتلته؟!!!

قتلته:

أخويا حضرتك بنفسك قولت أنه خاين وخان بلده !! .. وانا قتلته المفروض تدونى وسام الشجاعه.

كل كلام اللي كنت بقوله سواء مقتنع بيه أو لأ , كان هدفى منه حاجه واحده بس أنى أشوف أى أنطباع على وش مستر أكس غير الابتسامه دى , بس للأسف فضل مصدر أبتسامته وقال:
بس أنت لما قتلت النصابين دول ماقتلتهمش علشان هما نصابين !! أنت قتلتهم بنية قتل ولاد أخوك علشان تكوش على الورث

فسكت ومردتش

فكلم كلامه وقال:

أنا مبهور ببيك يا صمد تعرف ليه !!؟

قولته:

ليه ياباشا !!!؟

قالى:

علشان أنت اللي كسبت فى الآخر , كل اللي حاولوا يقفوا قصادك ماتوا وفضلت أنت عايش!!

كلهم كانوا مفكرينك ضعيف وممكن ياكلوك , وفى الآخر انت اللي كلتهم كلهم , حتى قيصر

بعصابتة مقدرش عليك!!!

أه صح شكرا أنك خلصتنا من قيصر والنمروسي دي حاجه البلد عمرها ما هتسهالك.

سكت شويه وكمل كلامه وقال:

لما عرضت فكرة أنى أوقف تنفيذ حكم الأعدام فيك , الأمر كان مستحيل , وكل اللي فوقى

رفضوا الفكره وعارضونى

بس عملت زيك يا صمد وأصريت على فكرتى وحاولت بشتى الطرق أقنعهم أن حياتك مهمه

حاليا , وان أنت الوحيد اللي ممكن توصلنا للكاليفورنيوم اللي دخلوا أخوك البلد.

وعلشان اللي فوقى بيتقوا فيا , وتاريخى المهنى كله أنجازات , وافقوا بس على مسؤوليتى

الشخصيه , ساعتها جتلك يا صمد وعملتلك أختبار العشر دقائق , لما قولتى أن كرسى أخوك

المخروم ممكن يكون فيه الكاليفورنيوم.

راجعت وراك المعلومه ولقيت فعلا فيه كرسى مخروم بمواصفات خاصه دخل البلد فترة تعب

أخوك وأتعملته تسهيلات فى الدخول علشان الحاله الصحيه بتاعة أخوك ووضعاه وعلاقاه

المهمه اللي فى البلد.

ساعتها قررت أنك ممكن تنفعنى يا صمد!!

فقولتله بقلق:

هو أنتوا طلعتونى علشان أجيب الكرسى وبعدين هتعدمونى تانى !!؟

فضحك وقال:

بص ماوعدكش تعيش بعدها ولا لأ, بس أوعدك أنك لو رجعت الكاليفونيوم , هأبذل قصارى جهدى فى أنى أخفف العقوبة لمؤبد, وهو صيلك على زنانه حلوه تقضى فيها اللى باقى من عمرك , ماهو ماينفعش يا صمد نسيب حيوان مفترس من غير مانقتله أو على الأقل نحبسه سكت ومعرفتش أرد بعد ماأصدمت من صراحته الفجة..

فقال:

تعرف الديق ويب يا صمد ؟

قولتله:

أسمع عنه..

فقال:

أكيد تسمع عنه , أنت خلبوص يا صمد وعارف كل حاجه , عارف أزاى ترفع فيديو فى النت وتكتب عليه فضيحة بنت الدوسرى!!!

المهم فيه موقع اسمه الفا باى ,موقع من المواقع أياها اللى بيتعمل عليها الصفقات المشبوهه , صاحب الموقع أتقبض عليه بعد ماساب ثغره وراه بالصدفه.

وجاتلنا معلومات ان ضمن الصفقات اللى تمت علي الموقع من داخل مصر، صفقة الكاليفونيوم اللى بندور عليها ,طبعا المعلومات مكنش فيها أسماء أو أماكن اللى عملوا الصفقه لأن باقى البيانات كانت مشفره , اللى وصلنا بس أن فيه أتفاق حصل.

وسكت شويه وقال:

أنت حكيتلى أنك أدبت الكرسي لمنصور البواب علشان يرميه صح ؟

قولته:

أها صح بس منصور ده عيل أهبل وأستحاله يكون عنده معرفه بالديب ويب , ممكن يكون حد

لقى الكرسي بعد ما رماه منصور وعمل الصفقه دى.

قالى:

دى مهمتك أنت هتروح لمنصور وتعرف منه أيه اللي حصل وهل ليه علاقه بالصفقه أو فعلا

رمى الكرسي وحد تانى لقاها وعمل الصفقه .. عايزك تستغل مواهبك وتوصل للى عملوا

الصفقه!!

قولته:

مش فاهم ياباشا , هو أنا اللي هعمل التحريات وأوصل للكرسي !!؟ طيب وانتوا هتعملوا أيه !!؟

قالى وهو مبتسم:

أحنا هنراقبك يا صمد , ماهو أنا مش هطلعك من الأعدام وأقعدك هنا فى الشاليه وأعرض حياة

ضابط برئ للخطر !!! كمان احنا مش عايزين نبان فى الصورة خالص علشان نعرف نمسك

العصابات دى.

أنا خرجتك علشان أنت اللي تعرف مكان الكرسي وعلشان أنت موهوب فى القتل وسفاح ولو
مت محدش هيزعل عليك ولا هيسأل عليك , ولو مسكوك ساعتها هتقولهم أنك بتدور على ورث
أخوك وممكن تكمل معاهم الصفقه لحد ماتوصلنا ليهم وماتقلقش هنجهزك وهنديك سلاح
وزخيره وواقى رصاص وكل حاجه كأنك شغال معانا بالضبط.

قولته:

لا سلاح أيه ياباشا , أنا ماليش فى السلاح ومبعرفش أستخدمه , أنا عايز معملى اللي فى القصر
ونبوت خشب هتلاقوه جنب الدفاهيه النار.

فقال:

المعمل وعارف ليه , علشان أنت راجل خريج علوم وبتفهم فى السموم !! أما النبوت ليه !?
قولته وانا اللي مبتسم المره دى:

أنا خايف بس تقول عليا مريض نفسى ... بس هقولك حاجتين فى حياتى عمرى ماهنساهم
الطبق اللي كنت باكل فيه زى الكلاب ... وده اتخلصت منه لانه بيفكرنى بذلى.
ونبوت قيصر أكثر حاجه كنت بخاف منها , كنت بخاف ينزل على راسى ويفشفشها فى يوم
وده احتفظت بيه لأن شايف أنى خوفك ماينفعش تتخلص منه, لازم تواجهه وتسيطر عليه
ياباشا.

قالى:

عندك ورقه وقلم وأكتب كل الى أنت عاوزه.

تانى يوم خدنى مكان زر عولى فيه شريحه تعقب فى ضهرى جوه جسمى!!

وبعدھا بيومين تانيين طلعتنا على شقه فى وسط البلد , دخلنا الشقه فلقيتها متجهزه زى معمل

بالظبط , وفى أقل من يومين كنت حضرت كل التركيبات اللى ممكن أحتاجها فى العمليه.

وأدونى عنوان الواد منصور وروحنته.

أول ماخبطت على الباب لقيته كان خارج , اول ماشافنى مكنش مصدق فى الاول, بس هديته

وخليته يقوم يعملى كوباية شاي.

دخل يعمل كوباية الشاي , وقعدت أستناه فعينى وقعت على شنته سفر سودا عند الباب , قربت

من الشنته وكنت لسه بفتحها لقيته طالع بكوباية الشاي فجريب ورميت نفسى على الكنبه بتاعته

ومددت.

كنت مفكر الأول أنه متوتر علشان مش مصدق أنى عايش , بس لما لقيت الشنته على الباب

شكيت فيه.

ولما سألته على الكرسى لقيته متوتر , وحتى مسألنيش أنا عايز الكرسى ليه , أو أشمعنى

الكرسى ده !!!, فعرفت أنه فتح الكرسى وعرف اللى فيه!!

خدته على أد عقله و عملت نفس مصدق أنه أدى الكرسى لحد بتاع روباكيا وقتله هفوت عليك

بكره , علشان يظمن أنى مش هراقبه..

وأنا على الباب حضرت فى أيدى مايك صغير من اللى أدهوملى مستر أكس , وعملت نفسى
بعيظ وخذته فى حضنى وفضلت أخبط على ظهره علشان أثبت الميكرفون فى لياقة قميصه من
غير ماياخذ باله , علشان أراقبه وأسمع كل تحركاته.

خذت نفسى وطلعت بالعريبيه بره فيصل وروحت على شقتى اللى فى وسط البلد , وانا فى
الطريق لشقتى , سمعته وهو بيتكلم فى التليفون مع واحد على الكاليفورنيوم وقاله انه قابلنى وأنى
لسه عايش!!! وفهمت أنه رايح معاه علشان يبيعوا الكاليفورنيوم!!!

أول ماوصلت شقتى ومعلمى , كنت سامع الواد منصور وهو فى عريبه بيتكلم مع أثنين تانيين
وسمعت كل كلامهم من الميك اللى زرعتة فى قميص منصور وعرفت أنهم رايحين طريق
السويس الصحرواى.

وسمعتهم كمان وهما بيوصفوا لبعض الطريق بالتفصيل!!

خذت فى أيدى النبوت وماسك دخان وجردل بنزين صغير وعبيت فى شنطه 10 أكياس قماش
صغيرين كنت محضرهم.

كيسين قماش فيهم بارود وزلط زى البومب بس بومب كبير , و8 أكياس فيهم طحن صبار
البيوط.

تسمع عن صبار البيوط .. أصلى خريج علوم وأفهم فى السموم..

صبار البيوط ده نوع من الصبار بيبقى طالع منه حاجات بارزه فسافيس كده بيسموها الازرار
... الازرار دى بتتطن لحد ماتبقى مسحوق..

المسحوق ده لما بتولع فيه بيطلع دخان بيحتوى على ماده أسمها الميسكالين واللى بتسبب الدوخه والهلوسه.

وصلت قبلهم للمكان علشان عربيتى كانت أسرع , ركنت عربيتى بعيد خالص عند الجراج وأتمشيت ناحية المنطقه اللى متحاوطه بالكاوتش , كانوا هما وصلوا.

منصور كان هيشوفى وأنا بستخبى منهم بس زوجت من عينه وسمعتة وهو بيتخانق مع الواد المترمل الى حاطت خطه خاييه وهبله زيه...

شويه ولقيت 3 عربيات دخله الدايره , استخبيت فى حته مداريه خالص بره الدايره وسمعت كل اللى حصل , فى الوقت المناسب حذفت كيسين البارود واللى عملوا فرقعه كبيره , شتت تركيز كل اللى فى الدايره.

وبعدين ولعت فى أكياس طحن الصبار اللى كنت مغطسهم فى البنزين , ورميتهم جوه الدايره عليهم ولبست ماسك الدخان , ومشيت وسط الدخان وعديت على كل اللى لابسين بدل ودغدغت دماغهم بالنبوت.

بعد الدخان ماخف خالص شيلت الماسك من على وشى لقيت منصور فاق وشافنى وانا فى أيدي نبوت قيصر...

تقريبا فكر نفسه بيهلوس وفضل يرجع لورا ,شويه ولقيت العيل المترمل اللى معاه طالع من جوه العربيه اللى فيها الفلوس , واول ماشافنى وقع على الارض ,وظلع صوت من مناخيره وهو بيقول:

ياسطى ده صمد طلع عايش ياسطى زى مابتقول... !!!

و قام من على الأرض واد معاهم كان بنضاره بصلى وقال:

مش ده صمد السفاح اللى عدموه!!!!

مديت أيدي علشان أقوم منصور و اللى قام وفضل باصص على النبوت اللى مليون دم وعلى

الناس اللى ببدل وراسهم متفشفشه!!!

نزل تانى على الأرض وباس رجلى وهو بيترجاني أسامحه

لسه هرد عليه, سمعت صوت عربيات كتيره بره الداييره وداخله علينا.

ببص حواليا لقيت يجى خمس عربيات تانيه نزل منهم حوالى أكثر من عشر رجاله وفي أيديهم

رشاشات وأسلحه وبيقفلوا علينا الداييره من بره..

حاصرونا من كل الاتجاهات وزنقونا جوه الداييره وطلعوا مسدسات ورشاشات ألى وبدأوا

يضربوا علينا نار وأحنا جوه الداييره!!!

الفصل الخامس عشر



جزمة ببوز معدن "

ببص حواليا لقيت يجي خمس عربيات تانيه نزل منهم حوالى أكثر من عشر رجاله وفي أيديهم

رشاشات وأسلحه وبيقفلوا علينا الدايره من بره..

حاصرونا

من كل

الاتجاهات

وزنقونا جوہ

الدايره



وظلعوا مسدسات ورشاشات آلى وبدأوا يضربوا علينا نار وأحنا جوه الدايره!!!

جريت وأنا فى أيدى النبوت ونطيت جوه العربيه المصفحه اللى فيها الفلوس ،جمب جثة السواق

اللى فشفشت دماغه, وناديت على منصور والاتنين الحمير اللى واقفين فى نص الدايره

وهيموتوا!!!

نط منصور والواد أبو نضاره جوه شنطه العربيه , و الواد المترمل وهو بينط...رصاصه جات

فى رجليه!!

أول مادخل قفلت بسرعه باب شنطة العربيه وقفلتها بترباس من جوه , والى معمول مخصوص

فى العربيات دى علشان لو حصل سطو على العربيه.

ضرب النار بقى كله موجهه ناحية العربيه!!

الواد المترمل مصدوم و عمال يبص لرجله المتصابه و بيصرخ من الالم ,مد أيده جوه جيبه

وظلع منه مجموعة حبوب كثيره وبيبلبعها , تقريبا بيحاول يسكن الالم!!!

بصيت جمبى على حاجه أكتم بيها الدم اللى خارج من رجليه , لقيت جثة السواق , فقلعته

القميص اللى لابسه ولفيته على رجل الواد المترمل علشان أكتم الدم.

ضرب النار لسه شغال على العربيه وحسيت أنه بيقترب , تقريبا بيقتربوا علينا وهايحاوطوا

العربيه من بره!!

منصور والواد أبو نضاره رجليهم بتخبط فى بعضها ووشهم أصفر من الرعب!!

منصور قال وهو مرعوب:

هنموت يازميلي العرييه مش هتستحمل وهنموت كنا.

أنهار وقعد يعيط ، لقيت الواد أبو نضاره بيعيط هو كمان !!! ,والواد المترمل مش مبطل
صرىخ!!

مش عارف أفكر والعيال دى لو سيطر عليهم الرعب, ممكن يموتوا منه قبل ما يموتوا
بالرصاص!!!

مسكت الواد منصور من كتافه وقعدت اهز فيه وأنا بقوله وبوجهه الكلام ليهم كلمهم:
لو خفتوا هتموتوا من الخوف قبل ماتموتوا من الرصاص ... أحنا هنعيش فاهمين ... العرييه
المصفحه اللي أحنا فيها دى بتستحمل كل أنواع الرصاص ولو رموا علينا حتى قنبله مش
هيحصلها حاجه .. رصاصهم هيخلص قبل مايخرموا فيها خرم واحد... فاهمين؟! ... !!

هزوا راسهم بس وهما لسه مرعوبين وبيعيطوا!!

قولتلهم:

مين اللي بره دول !!؟

فرد الواد أبو نضاره وقالى وهو بيترعش:

دول ناس تانيه جايين علشان الكاليفورنيوم!!!

قولته:

نعم !!؟

حط أيده فوق وشه علشان خايف أضربه وقال:

أحنا اتفقنا مع تلاته يجوا ياخدوا الكاليفورنيوم وقلنا اللي يجى الأول حلال عليه!!

أول ماسمعه لطمت على وشى..

قولته:

يعنى فيه ناس تانيه جايه غير دول كمان!!!

قالى وهو لسه حاطط أيده فوق وشه:

لا....أنا قولت للتلاته على معاد التسليم , بس بلغت أنتين بس بأحداثيات المكان بالضبط , مفيش

حد تانى جاى , اللي بره دول بس.

حطيت أيدي راسي من غباء العيال دى!!!

وروحنا مناوّل الواد أبونضاره بأيدي في وشه , أول ما سهى و نزل أيده

فجأ سمعنا ضرب النار بطل خالص , وهشششششش مفيش صوت!!!

بصينا لبعض وأحنا مستغربين , لقيت منصور بيقول وهو مرعوب:

يمكن مسدساتهم خلص...

الواد منصور مكمش جملته , والعربيه كلها أتنفضت , اترفعت لفرق وأتهبت تانى على الأرض

!!! وأحنا أتنفضنا معاها لفرق وخبطنا فى سقف العربيه ووقعنا تانى

,ودان كل واحد مننا كانت بتصفر وكل واحد كان ماسك راسه وجسمه وكان بيتلوى من الالم ...

رموا قنبله تحت العربيه!!

وضرب النار أشتغل تانى وأكثر من الاول تقريبا جالهم دعم!!

حاولت أفوق من الخبطه وأستجمع قواى

قومت وقفت وفردت ضهرى ،

قعدت أفكر وانا ببص حواليا فى كابينة العربيه.

لقيت النبوت وأزاز بيفصل ما بين كابينة السواق وشنطة العربيه , مسكت النبوت وحاولت أكسر

الازاز ده.

الحمد لله الازاز اللي جوه مكانش مضاد للرصاص وأتكسر بالنبوت بس بصعوبه.

نطيت فى كابينه السواق , أول ماشافونى اللي محاطين العربيه وجههوا كل ضرب النار على

الازاز اللي فى كابينه السواق بس الازاز كان مضاد للرصاص ومحصلوش حاجة!!

دورت على مفتاح العربيه علشان أدورها مالقتهوش!!!

ضرب النار شغال زى المطر علينا من بره العربيه وميخلصش!!

قولتهم بعصبيه:

فين مفتاح العربيه؟ ..!!!

محدث رد عليا !!..كانوا مصدومين ومش عارفين يعملوا ايه

كررت تانى وأنا بزق فيهم:

مفتاح العربيه يا ولاد ال... هنموت!!!

لقيت الواد ابو نضاره قام ومد أيده فى جيب البنطلون بتاع جثة السواق وطلع المفاتيح وأدهالى

..

خدت المفاتيح منه وحطيتها فى العربيه وحاولت أشغلها ماشغلتنش!!

فلقيت أبو نضاره بيقولى:

العربيه هتمشى أزاى بعد ضرب النار ده كله ؟!!!.... تانك البنزين أكيد أتخرم و الكاوتش ميه

فى الميه فرقع!!!

قولتله ووانا بحاول أدور العربيه تانى:

قولتلكم العربيه دى متجهزه علشان لو حصل عليها حالة السطو , تانك البنزين والماتور وكل

حاجه حيويه فى العربيه متصفحه , والكاوتش بتاعها أما مضاد للرصاص , أو جواه أطار معدن

ممکن يمشى بينا مساف...

قطعت كلامى لما سمعت صوت العربيه وهى بتشتغل!!!

دوست على البنزين جامد ورجعت بالعربيه لورا فخبطت كل اللى كانوا بيضربوا علينا نار من

ورا.

طلعت بالعربييه لقدام ناحية المخرج الاولانى اللى فيه العربييه اللادا اللى مركونه بضرها ,

خبطت العربييه اللادا من ضرها فطلعت قدام وفتحلى سكه أخرج من الدايره

جريت بالعربييه المصفحه بره الدايره ومشيت بيها جوه فى الصحرا

ده كله حصل وضرب النار لسه شغال على العربييه

..

طلع ورانا حوالى 5 عربيات بيطاردونا وبيضربوا علينا نار.

قلت للواد أبو نضاره:

نط هنا جمبى فى الكرسى اللى جمب السواق.

فضل متتحلى من غير مايتحرك

قولته وأنا بزق فيه:

تعالى جمبى هنا!!!

عدى من شنطة العربييه للكابينة وقعد جمبى فى الكرسى اللى جمب السواق.

عربيتن من اللى بيطاردونا حصلونا من غير مايسبقونا , طلع ناس من شبابيك العربيات و

فضلوا يضربوا علينا نار, دوست بنزين وسبقتهم فى السرعه.

حاولت أبص على كاوتش العربييه من المرايا اللى جمبى بس المرايا كانت مكسوره , قلت للواد

أبو نضاره يحاول يبص على كاوتش العربييه من نص المرايا اللى جمبه وسألته:

كاوتش العربيه مفرقع !!!؟

فقالى:

أها متهرتل ومتقطع خالص!!

فعرفت أننا ماشيين على أطار العربيه المعدن واللى هيخلى العربيه آخرها تمشى 80 كيلو بس

!!!!, مش هنقدر نهرب من كمية العربيات اللى ورانا دى , والعربيه هتعطل فى وسط

الصحرا!!!

فكر ياصمد !!! فكر ياصمد!!!

قلت للواد أبو نضاره:

أبعث احداثيات مكان التسليم للعصابه التالته اللى كنت متفق معاها.

قالى باستغراب:

نعم!!! عايز أيه يا اخويا !!! أنت عايز تجيب عصابه تانيه !!!, بدل ما نشوف هنخلص من اللى

ورانا ازاي!!!

قولتله بعصبيه وبحزم:

أسمع الى بقولك عليه والا والله هرميك بره العربيه

ومديت أيدى ناحية مقبض الباب بتاعه علشان أهدده ،

أيده كانت بتترعش وهو بيطلع التليفون من جيبه وبيعت أحداثيات مكان التسليم عند الدايره

وقالى:

جايبين بعد عشر دقائق

قولتله:

ليه طالبين أوبر !!؟ الناس دى بنتيجى بسرعه كده ازاي !!؟

قالى:

أصل كنت مبلغهم كلهم أن المكان على طريق مصر السويس الصحراوي علشان ميتأخروش
لما أبعثهم أحداثيات المكان بالضبط..

قطع كلامه وقالى وهو مخضوض:

..... أنت بتعمل أيه يخربيتك..... رايح فين ؟!!!

وقتها كنت بلف بالعربيه بسرعه وراجع ناحية الدايه تانى, لفيت بالعربيه وبقى وش عربيتى
فى وش العربيات اللى بتطار دنا , عديت من وسطهم وهما بيضربوا نار على العربيه ,
الواد اللى جمبى عمال يزقق فيا ويبرطم بكلام مكنتش مركز فيه.

كملت طريقى ناحية الدايه تانى بالعربيه , أفوا ورايا بعربياتهم وفضلوا يطاردونا.

فضلت بجرى بالعربيه لحد ماوصلت للدايه تانى, دخلت بالعربيه من أول مدخل لحد ما بقيت
فى نص الدايه ووش عربيتى قصاد المدخل التانى بالضبط ووقفت بالعربيه ونزلت أيدى من
على التاره و المفاتيح.

منصور قال وهو خابف

العرييه وقفت ليه ؟!!!

أبو نضاره قال بعصبيه وبرعب:

بطلت العرييه ليه؟ !!!..... أنت هتموتنا كلنا!!!

حتى الواد المترمل قعد يزعق فيا وهو بيقول:

أطلع هنموت!!!!

معداش دقيقه ولقينا كل العربيات اللى بتطاردنا دخلوا الداييره ورانا ،ونزلوا من عربياتهم

ودوروا الضرب من تانى فى العرييه اللى خلاص أتهتكت وبقت على وشك الانهيار.

اللحظه دى كل ثانيه فيها كانت بتعدى ساعه , شوقتها بالتصوير البطئ زى الافلام!!

الواد منصور بيكتم الدم اللى طالع من رجل المترمل والاتنين بيصرخوا فيا علشان أطلع.....

الواد أبو نضاره قام من كرسيه ومسك فيا , وفى لياقة قميصى وهو بيزعق فى وشى وبيقول:

فووووووووووووق.....أطلع بالعرييه هنموت!!!!

أستتيت اللحظه المناسبه, أول ماشوفت العصابه الثالثه قربت و داخله الداييره, زقيت الواد أبو

نضاره من عليا, وشغلت العرييه ودوست بنزين, خبطت عرييه من عربيات العصابه الثالثه قبل

ماتدخل الداييره ,وجريت بالعرييه بره الداييره.

اللى كانوا بيطاردونا فضلوا يضربوا رصاص كثير على العربيه وهى بتجرى , طلق الرصاص بتاعهم صاب ناس من العصابة التالته من غير مايقصدوا, فالعصابة التالته طلعا مسدساتهم ورشاشتهم وردوا عليهم , بعد ما فكروا أن فيه هجوم عليهم

العصابتين وقعوا فى بعض وبدأت الحرب ما بينهم جوه الدايره , هربنا أحنا بره الدايره..

بص الواد أبو نضاره وراه وقعد يتنطط من الفرحة ويبوس فيا

ومنصور قال بفخر:

سفااح يازمىلىوالله سفااح..

فرحتنا ماكملتش!!!

3عربيات من العصابة الثالثة جم وانا ، منهم عربيه مصفحه زى اللى معانا بيطاردونا

وبيضربوا علينا نار!!

دخلت فينا العربيه المصفحه وخطبتنا جامد.

العربيه بتاعتنا اتقلبت فى الرمله على جنبها الشمال, ناحية الكرسى اللى قاعد عليه الواد أبو

نضاره , اللى اتقلبت عليه وبقيت فوقيه وبيصرخ تحتى دلوقتى!!!

حاولت أقوم من فوقيه بعد ما مسكت فى التاره بتاعة العربيه وشديت جسمى لفوق , بصيت على

شنطة العربيه , فلقيت منصور والواد المترمل فوق بعض وفوقهم الشنط الصفيح اللى فيها

الفلوس...

حسيت بحركه رجلين فوق العربيه , فلقيت اللي بيطاردونا طلوعوا فوق عربيتنا اللي مقلوبه على
جمبها , بصيت من أزاز كبينة العربيه فلقيتهم فوق العربيه لابسين أفنعه على وشهم !!!

،ويضربوا رصاص على أزاز الكابينه علشان يكسروه!!!

الطلق بتاعهم معداش من الزجاج المقاوم للرصاص , وفضل حامينا جوه العربيه، بطلوا ضرب
نار على الأزاز وقرب واحد وطلع بخاخ ورش على الأزاز...

مديت أيدي ومسكت النبوت ,وغطيت وشي علشان عارف هو رش أيه.....

رش حمض الهيدروفلوريك!!!

الأزاز اتسرطن وكسروه بسهولة ،جرجرونا كلنا بره العربيه فى الصحرا قدام كشافات
عربياتهم...

كنت ماسك فى أيدي النبوت ومش عايز أسييه ,فضلوا يضربوا فيا برجليهم لحد ماسيت النبوت
من أيدي.

وبعدين وقفونا نص وقفه على كوع رجلينا وربطوا دراعاتنا لورا بأفيز بلاستيك!!

بعد ماربطونا واحد منهم كان عضلات ,لابس قميص أبيض وبنطلون بدله وفى رجله
لابس جزمه ببوز معدن..

قرب للنبوت اللي على الارض , ووطى مسكه وقعد يبص على الزخرفه اللي فيه , و قعد يهوش
بيه فى الهوا كانه بيضرب كوره.

وقال من غير مايصلنا:

فين الكاليفورنيوم !!!؟

محدث رد عليه

مسمعش بس غير صوت أنين و عياط الواد المترمل

اللى مش عارف يقف نص وقفه على رجله المتصابه.

قرب أبو جزمه ببوز من الواد المترمل وضربه ببوز الجزمه فى وشه , فوقع المترمل على

الأرض وهو بيتلوى على بطنه ومش عارف يمسك بوقه اللى بيسح دم ولا رجله اللى مضروبه

بالرصاص!!

قرب ابو جزمه من الواد المترمل , وطلع سكينه عامله زى الخنجر من جيبه وداس برجله على

ضهر الواد المترمل ومسك رقبتة وذبحه زى مايبدبحوا الخروف!!!!

منصور والواد أبو نضاره أتصدموا من المشهد وفضلوا يصرخوا ويعيطوا!!!!

المترمل قدامنا راسه مفصوله عن جسمه!!!!

قرب عليا أبو جزمه ببوز معدن

وحط السكينه على رقبتى وقال:

فين الكاليفورنيوم !!!؟

محدث رد عليه

فشد راسى لورا ومشى بالسكينه على رقبتى و حسيت بالدم بينزل منها.....

الفصل



السادس عشر

" كشكول سلك "

قرب منى أبو جزمه ببوز معدن

وحط السكينه على رقبتى وقال:

فين الكاليفورنيوم !!؟

محدث رد عليه

فشد راسى لورا ومشى بالسكينه على رقبتى و

حسيت بالدم بينزل منها.....

صرخ منصور فيه وهو بيدبحنى وقال:

أوعى تقتله ... هو الوحيد اللى يعرف مكان



الكاليفورنيوم.

فنزل السكينه من على رقبتى وزقنى فوقعت على وشى والدم فضل بيسح من رقبتى

كامل منصور كلامه وهو بيتشحتف ومرعوب وقال:

شوفته وسط الدخان وهو بيثيل الشنطه , وبيخبىها , بس والله ما اعرف هو خباها فين.

أبوجزمه ببوز قاله:

مدام هو الوحيد اللى يعرف مكان الكاليفورنيوم يبقى أنتوا مالكوش لازمه!!!

وقرب من منصور وفى أيده الخنجر!!!

قلته:

لو قتلتم مش هقولك على مكان الكاليفورنيوم!!

بس الجملة دى ماطلعتش منى كده !!! طلعت منى بصوت حشرجه من غير كلام!! , تقريبا

حبالى الصوتية اتأثرت وصوتى مابقاش طالع!!!

أنتططت على الأرض وشاورت بأيدى اللى مربوطه ورا ضهرى علشان مايدبحش منصور

بس مكنش منتبه ليا!!

مسك السكينه وحطها على رقبة منصور , فضلت أنتطط مكانى والف وانا بحاول أتكلم....

صوتى مش طالع!!!

حاولت أصرخ طلع صوت حشرجه عالى أنتبه ليه أبو جزمه , وساب منصور , قرب عليا وهو

بيقول:

بتقول حاجه !! فهزيت راسى بالموافقه.

فقال وهو بيضحك:

طيب ماتقول!!

طلعت صوت حشرجه , و قعدت أتلوى على الأرض ،فهم أنه مزق حبالى الصوتيه
وهو بيدبحنى.

جه ورايا وانا نايم على بطنى وقطع الافيز البلاستيك الى رابط أيدى من ورا
وقالى:

لو مبتتكلمش تبقى تكتب...

ايدى أتحررت فمسكت رقبتى اللى بتجيب دم , وكتبت بأيدى التانيه على الرمل:
لو قتلتهم مش هقول حاجه...

ضحك ومسك النبوت وضربنى على راسى , أغمى عليا فتره كبيره.....

فوقت بس لسه مفتحتش عيني , حسيت أنى نايم على ضهرى فوق سرير , مديت أيدى وحسست
على رقبتى , فحسيت بلمس الشاش واللقط الطبي على رقبتى!!

فتحت عيني على سقف فوقيا , حاولت ألق برقبتى بس ماقدرتش من الجرح ,فحاولت أقوم

بجسمى كله ,قومت بس بصعوبه , ولفيت بعينى علشان أشوف الاوضه اللى محبوس فيها!!!

كانت تقريبا 3 متر فى 3 متر , أرضيتها وسقفها من الاسمنت , على الارض مرمى قدامى بواقى

علب كريمات وزيت شعر لشركة معروفه , تقريبا أنا فى مخزن من مخازن الشركه دى!!

واللى أكيد ليها علاقه بالعصابه أن مكانتش العصابه نفسها , عصابة مافيا مستخبيه تحت أسم

شركه تجميل معروفه!!!!

الايوضه مفيهاش شبابيك خالص , المكان الوحيد اللى داخل منه الشمس هو خرم صغير فى

الحيطه!!

الباب بتاعها من الحديد وفيه فتحه تحته زى شراع أو شباك صغير فى حجم فتحة شفاط المطبخ

أو أقل شويه , تقريبا علشان يدخلوا منه الاكل من غير مايفتحوا الباب زى السجن الانفرادى

بالضبط....

فيه كاميرا فوقى و مغطيه الاوضه كلها , بصيت للكاميرا , فعرفت أنهم هيجوا دلوقتى لما

يشوفونى فوقت.

حاولت أطلع صوت بس صوتى ماطلعش طلعت الحشرجه بس!!

سمعت صوت تكة فى الباب الحديد وأتفتح بطريقه أوتوماتيك!!

أول ما أتفتح الباب شوفت حجم الباب الحقيقى وسمكه التخين , وشوفت اللى فتح الباب فى أيده

كارت ممغنط بيفتح بيه الباب!!

فعرفت أنه باب كهربا من الابواب الحديثه لو كان باب عادى بمفتاح كنت عرفت افتحه من جوا

فى اقل من دقيقتين!!!

دخل من الباب أثنين فى حجم بعض ولا بسين زى بعض, قميص وبنطلون بدله و على وشهم
أفئعه, وماسكين فى أيديهم عصيان كهربا!!

قرب عليا واحد منهم ,اللى كان لابس جزمه ببوز معدن , و ميزت صوته وهو بيقولى:
ها بقيت بتعرف تتكلم!!!

فطلعت صوت حشرجه من زورى , فمد أيده لورا فاللى معاه أداله قلم فرنساوى وكشكول سلك
خدهم منه ورماهم عليا، وهو ماسك فى أيده التانيه العصايا الكهربا
وقال:

بس بتعرف تكتب !!.... اكتب مكان الكاليفورنيوم.

فتحت الكشكول وكتبت بالقلم:

فين اللى كانوا معايا ؟

ضحك وشاور للى واقف معاه فطلع بره الاوضه ,ومشى فى طرفه؛ بعدها سمعت صوت

عصيان الكهربا وهى بتشتغل وصوت الواد منصور والواد أبو نضاره وهم بيصرخوا..

حط أيده على ودنه كأنه بيسمع وقالى:

ها أطمنت !!؟

ونغزنى فى صدرى بالعصايا الكهربا وهو بيقول:

أكتب مكان الكاليفورنيوم....

فكتبت:

لو قلت مكانه هتقتل.....

جسمى أنتفض من عصاية الكهربا اللى فى أيده , ووقعت على الارض , فضل يضرب فيا ببوز

جزمته ويكهربنى بالعصايا , كنت بتلوى فى الارض ورقبتى بدأت تنزف تانى , واغمى عليا

..أو عملت نفسى أغمى عليا علشان يبطل ضرب!!

سمعتة وهو بيزعق فى واحد وبيقوله:

ألحقه قبل مايموت!!!

اللى بيزعق فيه قاله:

مش قولتلك أصبر شويه لحد ماجرحه يلم , بعد كده أبقى عذبه براحتك!!!

شالونى وحطونى على السرير

.

شالوا الشاش من على رقبتى وغيروا على الجرح وسمعتهم وهما بيتخانقوا مع بعض علشان

الجرح فتح تانى !! , حسيت بأيد بتخيظ فى رقبتى ولفوا شاش تانى ولزق وسابونى ومشيو!!!

كنت تعبان وأغمى عليا فعلا.....

فوقت لما لقيت على وشى شعاع ضوء داخل من الخرم الوحيد اللى فى الاوضه.

وسمعت صوت رجلين اللى واقف بره على الباب الحديد وهى بيتمشى بعيد عن الباب.

الاسمنت موصل جيد جدا للصوت...

حطيت ودنى على الحيطه الأسمنت اللى جمبى ,وحاولت أسمع بيقولوا أيه لبعض
مسمعتش كلامهم بس سمعت أصواتهم وتقريبا كانوا متجمعين , بعدها بشويه تقريبا ساعه ,
والشراع اللى تحت الباب أفتح وسمعت صوت زى طبق معدن أترزع على الارض!!
بعديها صوت السجان اللى بره وهو بيقول:

قوم ... كل...

حاولت أحرك جسمى من فوق السرير ماقدرتش بالعكس جسمى هبط وغيبت عن الوعى فتره
...

محتاج أكل علشان جسمى يقدر يتعافى , حركت جسمى بالعافيه ورميته براحه على الأرض
وفضلت أزحف ناحية طبق الأكل , واللى كان فيه بسله ورز وحتة فراخ , وكيس صغير فيه
حبايتن مضاد علشان الجرح ... وأزازه ميه

حاولت أكل , بس كان فيه صعوبه فى البلع ,أكلت اللى قدرت عليه , وزحفت تانى ناحية
السرير, وطلعت عليه ونمت...

صحيت تانى يوم بنفس الطريقه ,شعاع نور على وشى وصوت رجلين السجان اللى بره وهو
بيبعد عن الباب , حطيت ودنى على الحيطه وسمعت صوتهم وهما متجمعين , تقريبا ده معاد
الاكل بتاعهم وكان ثابت فى كل يوم ,كأنه معاد الراحه بتاع عمال مصنع أو معاد بريك
لموظفين شركه ...شركة مستحضرات تجميل..

كل يوم كنت بسمعهم وهما بيكهربوا منصور والواد أبو نضاره , معرفش ليه !!؟ مع أنهم
ميعرفوش حاجه !! , ممكن علشان أخاف وأنا بسمع صراخهم فأبقى متحضر نفسيا بعد ما أخف
وأكتب مكان الكاليفورنيوم على طول....

فكرت فى الشريحه الاليكترونيه المزروعه فى ضهرى , وفكرت فى مستر أكس واللى ممكن
يتتبع مكان الشريحه ويجى ينقذنى!!

وبعدين أفكرت أن العصابه كهربتنى جامد , واللى ماتعرفوش أن الكهربا دى ممكن تحرق
الشريحه الالكترونية اللى فى ضهرى أو على الأقل تشوش على الاشاره!!
حتى لو الشريحه ما أتحرقتش , مستر أكس قالى أنه مش هيتدخل ويعرض حياة ضابط للخطر ,
تقريبا كانوا زارعين الشريحه علشان يراقبونى لوفكرت اهرب بره مصر!!!

مش علشان ينقذونى لو فيه خطر عليا!!

محدث هينقذنى واللى بره دول هيفضلوا يعذبوا فيا لحد ما أقول على مكان الكاليفورنيوم ولما
أقولهم هيموتنى ويموتوا العيال!!!

وفى مره والسجان بيفتح الشراع وبيرمى طبق الاكل زى كل يوم , خدت بالى من حتته بارزه
فى الحيطه اللى وراه , تحت الكرسى اللى بيعد عليه , أتمنيت من ربنا تكون الحاجه اللى فى

بالى!!

وفى يوم قربت من الباب الحديد و مديت أيدى من الشراع ومسكت رجل السجان , اللى اتخض
وطلع عصاية الكهرباء وكهرب أيدى اللى طالعه من الشراع , فسحبتها بسرعه لجوه تانى وسمعتة
وهو بيسيب ويلعن فيا....

هدفى من الحركة اللى فاتت أنى أقيس المسافه اللى ما بين أيدى وما بين الحته البارزه اللى فى
الحيطة تحت رجله.

لقيت أن أيدى لو مديتها لآخرها من الشراع أستحاله توصل للحته البارزه!!!

أستتيت لحد ماجسمى بدأ يتعافى بس من غير ما أبين.

كنت ببين نفسى فى الكاميرا تعبان ومش قادر , علشان أكسب وقت وصحه أكثر , لحد ما فى يوم

أسترجعت صوتى شويه وممكن أتكلم... بس خبيت

بسمع كل يوم منصور والواد أبو نضاره بيتكهربوا فى الاوضه اللى جمبى , لحد ما فى يوم

ماسمعتش غير صوت الواد أبو نضاره بس ... منصور !!! , يكون مات وهم بيعذبوه!!

طلعت القلم والكشكول السلك وكتبت جمله فى ورقه وطلعت على السرير وحتيت الورقه فى

وش الكاميرا.

الورقه كان مكتوب فيها

تعالا وأنا أقولك الكاليفونيوم فين!!!

وأنا بنزل الورقه حركت الكاميرا بطرف أيدى حركه خفيفه خلتها متغطيش الحته اللى عند باب

الاوضه...

جم وهما لابسين الاقنعه على طول اول ماشافوا الورقه فى الكاميرا.

أبو جزمه قالى وهو ملهوف:

فين؟!!!!

قولتله:

فى...ك

وشه أتقلب لما لقانى بشتمه وأعصابه فلتت وفضل ينزل فىيا ضرب بالعصايه الكهربا!!

واحد من اللى كانوا وافقين معاه مسكوا وحاشه عنى

وقاله:

أحنا قولنا هنستنى لحد مايخف وبعدها هنخليه يتمنى الموت , لو مات دلوقتى مش هنعرف مكان

الحاجه!!

بطل ضرب فىيا وتف عليا , ومشى وقفل الباب....

سابنى بكح دم و بتلوى على الارض , زحفت لحد السرير وطلعت فوقيه ونمت.....

صحيت تانى يوم على الشعاع , معاد أكلهم ,سمعت صوت رجلين السجان وهيا بتبعد عن

الاوضه.

قومت بسرعه من مكانى ومسكت الكشكول السلك وطلعت منه السلك الحديد بتاعه.

وطيت على الأرض وخذت علبتين زيت شعر من اللي مرمي في الأوضه حواليا , وروحت
ناحية الباب عند الحته اللي الكاميرا مبقتش مغطياها.....

تعرف لو دهنت جسمك بالزيت ممكن تعدي من مكان صغير جدا حتى لو كان جسمك أكبر من
المكان!!!

قلعت القميص ودهنت راسي كلها وجسمي من فوق بزيت الشعر واللي خلى جسمي بقي بيزفلط
فتحت الشراع من جوه، حاولت انفذ منه بنص جسمي المدهون بالزيت , جسمي زفلط وعرفت
أطلع راسي وأيدي الاتنين من الشراع ووصلت للحته البارزه اللي في الحيطه وحكيته بالسلك
اللي في أيدي , فباننت حدود علبه بلاستيك في الحيطه!!!

حاولت أشد الغطا بتاعها من فوق العلبه وأنابخر حواليها بسلك الكشكول ونجحت أني أتني
الغطا وأشوف السلوك الكثيره اللي جوه علبه الكهربا!!!!

مش عارف أي سلك ممكن يفتح الباب , قعدت أشد في السلوك كلها وأحاول أقطع فيها بس
السلوك تخينه أوي وأستحاله تتقطع..

معاد الاكل بتاعهم قرب يخلص!!!!

أنزقت في شراع الباب مش عارف أقطع السلوك ومش عارف أرجع تاني للأوضه!!!



الفصل السابع

عشر

" تطهير "

مش عارف السلك اللى ممكن يفتح الباب, قعدت أشد فى السلوك كلها وأحاول أقطع فيها بس

السلوك تخينه ومش

راضيه تتقطع...

معاد الاكل بتاعهم قرب

يخلص!!!!

أترنقت فى شراع الباب

مش عارف أقطع

السلوك ومش عارف

أرجع تانى للأوضه!!!



حكيت سلك الكشكول اللى معايا فى الارض بسرعه.

بريته زى المشرط وقطعت بيه العازل البلاستيك اللى فوق السلوك التخينه وخليتها عريانه.

مسكت سلك الكشكول اللى معايا ووصلت السلوك العريانه كلها فى بعضها.

العلبة فرقعت فى وشى وكهربتنى بعد ما عملت قفله , وسمعت صوت تكه الباب اللى أتفتح

أوتوماتيك!!!!

الباب أتفتح وانا جسمى مزنوق فى الشراع , حاولت أسلت جسمى من شراع الباب , نجحت بس

بعد ما شراع الباب ساب جرح عميق بالطول فى نص جسمى المدهون.

طلعت بره الباب ووقفت على طولى ومشيت بسرعة فى طريقه طويله ومليانه أوض وأنا ماسك

جمبى اللى ببسح دم!!

وزى ماتوقعت المكان طلع مخزن أدوات تجميل , وصلت آخر الطريقه , لقيت آخرها فسحايه

كبيره , وقدامى تلاته قاعدين فارشين على الأرض وبياكلوا جمب كل واحد منهم عصاية

الكهربا بتاعته..

لفيت وكنت هرجع تانى بس عيني وقعت على النبوت بتاعى .النبوت بعيد عنى ..وعلشان

أوصله لازم أعدى من وراهم من غير ما يحسوا بيا.

عديت من ورا الصناديق اللى فيها مستحضرات التجميل , وأستخبيت لحد ما وصلت للنبوت أول

ما مامسكته حسيت أنى سيطرت على خوفى و أن روحى رجعتلى , حسيت أنى أقوى ونسيت

الجرح اللى فى جمبى!!!

عديت من ورا الصناديق تانى , وروحت ناحية الطرقة اللي فيها الأوض , وخذت فى أيدي كام
علبة زيت تانيه وداقتها فى الطرقة اللي قبل الاوضه ووقفت قدام الأوضه وفى أيدي النبوت.
أستنتيتهم يخلصوا أكل , خلصوا ودخلوا الطرقة , أول ماشافوا باب الاوضه مفتوح ولقوني
واقف بره بالنبوت ..أتذهلوا وبصوا لبعض وجريوا عليا وفى أيديهم عصيان الكهربا , فأتزحلقوا
من الزيت اللي دلقته على الأرض ووقعوا تحت رجلي.

نزلت على راس كل واحد فيهم بالنبوت , كل واحد منهم خدله ضربه واحده فى الاول علشان
ألحق أدوخهم كلهم بسرعه قبل ما حد منهم يقوم!!

كل واحد منهم دلوقتي يعينى ماسك راسه اللي بتجيب دم , عديت عليهم واحد واحد بالنبوت
ودغدغت راس كل واحد فيهم!!!

بس ولا واحد فيهم لابس جزمه بيوز معدن!!!

خذت كل الكروت الممغنطه بتاعتهم واللى بتفتح أبواب الاوض , وعصاية كهربا من بتوعهم ,
وعديت على كل الأوض اللي فى الطرقة , وفتحت بيبانها وأنا بدور على منصور والواد ابو
نضاره.

لحد مالقيت الواد أبو نضاره فى أوضه ونايم على السرير , مكنش مصدق نفسه أول ما شافنى
فتحت الباب.

حاول يقوم من على السرير بس مكنش قادر ... روحت سندته , وقولته:

لو ماقومتمش دلوقتي و أتعافيت على نفسك هتموت , دى فرصتنا الوحيد علشان نهرب ... فاهم
..... وز عقته وأنا بقول:

قوم على رجلك ندور على منصور , وخذ دى فى أيدك

أديته عصاية الكهرا

قام ورايا وهو بيتسند على عصاية الكهرا ومشى ورايا بالعافيه.

فضلت أفتح فى الأوض وكنت خايف مالقيش منصور.

لحد الحمد لله مالقيته فى أوضه مغمى عليه فى سريره وخلص بيطلع فى الروح , قولت للواد

أبو نضاره يسندوا معايا , وفضلنا ماشين مسنديه لحد ماطلعنا بره المخزن , اللي كان فى وسط

الصحرا!!!

بصيت حواليا لقيت على مرمى بصرى بعيد زى مايكون طريق أسفلت , قولت للواد أبو نضاره

وانا بشاورله:

هنمشى كده ناحية الطريق الاسفلت اللي هناك..

فهزلى براسه, وفضلنا شايلين منصور وماشين بيه ناحية الطريق , لحد ما سمعنا صوت رجلين

بتجرى ورانا و بعدها صوت طلق نار بيضرب و صوت ابو جزمة بيقولنا:

أقف مكانك منك ليه والا هفرغ المسدس فى جتكم كلكم.

وقفنا وسيبنا منصور من ايدينا فوق على الأرض, و رميت النبوت ورفعت أيدى فوق راسى

,وكذلك الواد أبو نضاره رمى عصاية الكهرا ورفع أيديه فوق راسه.

أمرنى نلف بوشنا.

لڤينا فشفونا وشه من غير قناع.

قولته:

لو موتنا مش هتعرف مكان الحاجه فين !! هقولك مكان الحاجه بس تسيبنا نعيش !؟

مردش عليا وضرب الواد أبو نضاره بالرصاص في رجله فوقع على الارض وفضل يتلوى

وهو ماسك رجله , وقرب منى وحط المسدس على راسى وهو سخن!!

قولته وأنا بصرخ:

خلاص خلاص هقولك فين بره الدايره مكان التسليم حفرت حفره جمب ال أأ.....

زق رأسى بالمسدس وقال:

هااااااا حفرت الحفره فين !!؟

قولته وأنا مرعوب ومغمى عيى:

مش عارف أوصف مكانها بالضبط .. ممكن ممكن اخذك هناك على طول أو هات ورقه وقلم

وانا أرسلك خريطه لمكانها.

فزقنى برجله , وقعت على بطنى فوق الرمله وقالى:

أرسم على الرمله....

ايه ده هو أنا مت؟!!!

عيني ثقيله ومش عارف أفتحها..

فيه أصوات بنى آدمين جمبى, فيه صوت ميزته , وعارف صاحبه

فيه ضوء أبيض ضارب فى عيني

وواحد لابس برنيطه بيبصلى , ملامحه بانته من الضوءمستر أكس؟!!!

سمعتة بيقول:

مذهل!!! حكمتك ياربى!!!!!!

فتحت عيني لقيته قاعد جمبى على سرير , بصيت حواليا لقيت كيس دم متوصل بأيدى , والأيد

التانيه متكالبشه فى السرير.

قالى:

تقدر تتكلم؟!!!

قولتله:

لبلب ياباشا ... عايز أسند ضهرى.

سندلى ضهرى بمخده ومش عارف ليه أفكرت عدنان فى اللحظة دى!!!

قولتله:

أنا فين؟!!!

فبص حواليه وقال:

فى مستشفى سجن طره فى عنبر خاص

قولتله:

جيت هنا ازاي!!؟

قال:

الشريحه اللي فى ضهرك!!!

فقولتله:

بس أنتوا جيتوا متأخر أوى!!!

قالى:

أحمد ربنا أننا جينا أصلاً! الشريحه كانت محروقه, لولا مهندس شاطر شغال معانا قدر يوصل

لآخر مكان كنت فيه قبل الشريحه ماتتحرق.

طبعا خد وقت كثير على ما فك تشفير..... قطع كلامه وسألنى بأبتسامه

أنت ازاي عايش يا صمد لحد دلوقتى!!!؟

فبصتله بأستغراب

فقال:

لما لقيناك كنت خلاص يعتبر ميت , الجرح اللي فى جمبك , كفيل يموت شاب قوى فى أقل من
ساعه !!؟! ... نزل دم منك كتير وكنت قاطع النفس ومرمى فى الصحرا, و فيه غربان كانت
واقفه حواليك.

مستنياك تموت علشان تاكل لحمك ... أو ممكن علشان تحميك!!!

نقلناك فى العرييه وأحنا مفكرينك ميت , وفجأه شهقت شهقه طويله كأن روحك ردتلك تانى ,
ولقيناك بتتنفس تانى بس بصعوبه , جنبناك هنا المستشفى وعالجناك , أديك أهوه قدامى عايش

!!!!

قولته:

أمال فين العيال اللي معايا ؟!!!

بصلى بأستغراب ودى كانت أول مره أشوف فى وشه أنطباع غير الابتسامه!!!

يمكن علشان معلقتش على اللي قاله وسألته على العيال!!!

رجعت أبتسامته تانى , وفتح ستاره جمب السرير , فبانوا نايمين على سراير جمبى بس فايقين

,وقاعدين نص قعده على السرير , متكلبشين فى السراير بتاعتهم زيى!!

أول ماشافونى هللوا وهما فرحانيين , بصلهم مستر أكس فقطعوا الكلام!!

وقالى:

لا دول لقيناهم فايقين , وحالتهم مكانتش حرجه زيك , أنت اللي انا لسه مستغرب أزاى عايش

؟!!!

قولته:

فى أيه ياباشا أرداة ربنا , ربنا عايزنى أعيش , بلاش تموتونى أنتوا بقوا والنبي

قال:

أرداة ربنا !!!..... ممكن !! بس أيه الحكمة من أنه ينقذ سفاح زيك من الموت!!

فقلت:

حكمتك يارب !!!... ممكن ربنا طول فى عمرى علشان أنقذ العيال دى ياباشا واللى مش عارف

أنا كنت حريص أنى أنجدهم ليه!!

حاجه كانت بتحركنى أنى أنقذ حياتهم , كأن ده هدفى ...مش الكاليفورنيوم!!!

قالى وهو مبتسم:

أها صح عجبتنى حركة الجى بى أس اللى حطيته فى شنطة الكاليفورنيوم, تعقبناه ولقينا الحفره

اللى فيها الشنطه...

قولته:

بس ايه رايك !! غلبت 3 عصابات .. مفروض تسمونى صمد بوند...

ضحك بصوت عالى فقاتله وانا مبتسم:

أظن أنا كده عملت اللى عليا ياباشا ...وانقذت البلد .. أنت وعدتتى أنكم مش هتعدمونى!!!

قالى:

لا أنا وعدتك أنى أبذل قصارى جهدى...!!!

سكت شويه وضيق عينه وقال:

وبعدين فيه حاجه ثانيه وزن الكاليفورنيوم اللي لقيناه مكنش رقم صحيح كان ناقص تقريبا 30

جرام!!!

قولتله:

والله ماخذت حاجه,وزى مالقتهم سبتهم وخطيت فوقيهم الجى بى أس

قالى وهو مبتسم:

مصدقك يا صمد أصلك مش هتعرف تتصرف فيهم لانك فى كل الحالات مش هتطلع من

هنا!!

سكت شويه و لعب فى دقنه وقال:

بس عندى سؤال محيرنى يا صمد!!!

قولتله:

أفضل يا باشا!!

قالى:

أنت ليه أستحملت 10 سنين؟! ... قصدى يعنى ليه ما قتلتش أخوك من تانى سنه ولا تالت سنه

مثلا!!!

قلت:

عشر سنينبغذيه بدمى .. عشر سنين ... بأكله وأشيل حمامه.. عشر سنين ... كنت مستتى
قدر ربنا يجى لوحده, وصبرت عشر سنين على عذاب أتحدى أى بنى آدم يصبر عليه أسبوع
واحد ...!!! يمكن لو كنت صبرت الليله دى كمان كان مات لوحده , ومكنش حصلى كل

حصل؟!!!

عيني خدعتنى و عيطت وأنا بقول:

أنا مش بكره أخويا ياباشا , بالعكس أخويا كان بيديني حق دميعيشه نضيفه فى مكان
نضيف وميزانيه مفتوحه أصرف منها عليا وعليه , أنا كنت زعلان علشان عمره ما شكرنى,
بالعكس كان بيعاملنى وحش مع أنى سبب حياته , كان بيتف عليا ويعامل كلبه أحسن منى!!!

طب طب على كتفى و لبس برنيطته و خد نفسه ومشى !!! وقالى وهو ماشى:

يومين وهقولك هنعمل معاك آيهمش هسيبك متعلق كتير!!!

يومين زى ما وعدنى وجالى المستشفى , أول مادخل عليه قولتله:

هاهتسبونى أعيش؟!!!

شوفت أنطباع تانى على وشه غير الابتسامه كان حزين!!

قالى:

هتتحط فى التلاجه!!!

قولته بأستغراب:

تلاجه !!؟

قالى:

صدقنى يا صمد الموت هيبقى أهون ليك ... هما مش هيعدموك .. بس هتتسجن الى باقى من
عمرك فى زنزانه لو حدك هتطلع من الزنانه على قبرك , مينفعش تتسجن وسط مساجين عاديه
لأنك المفروض ميت!!!

قلت لنفسى:

يعنى هعيش اللي جاى من عمرى فى عذاب تانى , سجن أنفرادى!!! اللي هى عقوبه للى
مسجون عادى أصلا , سجن أنفرادى مدى الحياه !! .. ده العرض اللي جالى بيه مستر أكس!!!
واللى قبلته علشان مش عايز أموت!!

جم فى نفس اليوم وغطوا وشى بكيس قماش أسود , ونقلونى فى زنزانه أنفرادى فى سجن قاللى
أنه شديد الحراسه ومش هعرف أهرب منه مهما حصل..

انا اصلا مش فى نيتى الهروب ... بالعكس ... لما مستر اكس قالى انهم لقونى ميت وردت فى
الروح , عرفت انها رساله من ربنا وابقى غيبى لو مفهمتش معناها..

طلبت من مستر أكس طلب قبل مايقفلوا عليا زنزانتى , قبرى فى المستقبل.

طلبت منه يجبلى شيخ وسطى من الأزهر , أستغرب جدا وسألنى عن السبب

فقولته:

عايز أتوب قبل ما أموت!!

ضحك وقالى:

اللى زيك مالوش توبه يا صمد , أنت قاتل وسفاح..

سكت شويه وقال:

بس هجيبلك شيخ يا صمد...

بالفعل يومين و جالى مستر أكس الزنزانه ومعاه شيخ أزهر..

أول مادخل الزنزانه وشافنى مقدرش يخبى أندهاشه من أنه شايف صمد السفاح لسه عايش!!!

وبص لمستر أكس , واللى هز راسه وهو بيظمن الشيخ وقال:

هسيبكم مع بعض يا شيخنا , هستناك بره الزنزانه علشان أوصلك فى طريقى للازهر وأنا هنا

جمبك و سامع كل حاجه متقلقش يا شيخنا.

وخذ نفسه وطلع بره الزنزانه.

مديت أيدى أسلم على الشيخ ,واللى تردد شويه وبعدين سلم عليا وسحب أيدى بسرعه..

قولته:

مش هطول عليك يا شيخنا أنا عايز أتوب , هل ليا توبه?!!

فقالى:

مش لما تحكىلى الأول قصتك علشان أعرف أجاب على السؤال!!!

قولته:

كل الناس عارفه قصة صمد السفاح!!!

قالى:

انا عايز أسمع قصة صمد السفاح من صمد نفسه..

حكيتله قصتى بكل صدق.

قام وقف وقعد يفكر وهو بيلف فى الزنزانة وبيسبح بسبحته وقال:

مالكش توبه!!!

قولته:

علشان قتلت؟!!

قالى:

القتل من الكبائر , لأنك بتتدخل فى عمل الله طبعاً مش أردته عز وجل , بس أنت مالكش توبه

من القتل مش علشان قتلت لأ.....علشان حاجه تانيه!!!

خلينى أحكيك قصه عن قاتل قتل 99 نفس, وراح لشيخ وسأله اذا كان ليه توبه ولا لا؟!!

فالشيخ قاله لأ لن تقبل لك توبه , فقتله هو كمان!!! وكمل ال100 نفس!!

سأل القاتل عن حد تانى يكون عالم فى الدين والناس دلوه على عالم دين تانى فراحله...

وحكاه قصته وسأله هل تقبل لى توبه؟!!

العالم قاله أنه ليه توبه , بس لو أقر بالذنب وأخلص التوبه لله .. ودله على قريه أهلها صالحين

وبيتعبدوا الله وقاله يروح هناك يتوب لربنا , وهو فى نص السكه مات قبل مايوصل للقريه!!!

ملائكه الرحمه والعذاب أختلفوا هل تقبل توبته أم لا!!

فاضطروا يقيسوا المسافه ما بين القريه اللى طلع منها وما بين القريه الصالحه اللى كان فى نيته

يتوب فيها فطلعت المسافه أقرب للقريه الصالحه بحاجه بسيطه جدا فقبلت توبته!!!

قلتله:

طيب أشمعى أنا ... ماليش توبه!!!

قالى:

علشان مش معترف بالذنب .. انت شايف أنك كنت بتدافع عن نفسك من النصابين ... بس أنت

كان نيتك قتل أبناء أخوك!!!

وكمان فيه شروط لقبول توبه القاتل , هيا مش شروط هيا 3حقوق لازم تأديها

حق الله , حق المقتول , حق ولى الامر...

حق الله وده ببسقط فى حالة التوبه النصوحه واللى بتشترط الاعتراف بالذنب والندم على

ما فعلت والعزم على عدم ارتكابه الجرم أو الذنب ثانيا.

حق المقتول وده أما بياخد من ميزان حسناتك فى الأخره أو يصلح الله بينكما أو يسقط الله حق

المقتول فى حالة الاخلاص التام فى التوبه.

حق أولى الأمر , ودول أهل القتيل واللى لازم تسلمهم نفسك و يحصل صلح ما بينكم و يعفو عنك.

قولته بعصبيه:

نعم!!!! ودول أوصل لأهاليهم أراى بقولك نصابين ياشيخنا وكانوا عايزين يقتلونى!!!

أضايق من صوتى العالى وقام علشان يمشى!!

فأعترضت طريقه وقولته أنا أسف ياشيخ , أرجوك ماتسبنيش , أسنتى والله انا عايز أتوب و

اطهر نفسى , ياشيخنا ربنا نجانى من أهوال كثيره , يمكن عايزنى أقابله نضيف , أرجوك

ساعدنى!!

رجع قعد مكانه وقال:

أنا مقدرش أساعدك , أنت بس اللى تقدر تساعد نفسك , ولازم تعترف بالذنب بينك وبين نفسك.

قولته:

طيب أعترف بذنبي أراى واطهر نفسى اراى؟!!!

فكر شويه وقال:

أكتب أكتب كل اللى عملته ... أكتب أحساسك الحقيقى وأنت بتقتل ... وأقرأه .. اقراه بنظرة

حد تانى غير صمد حاسب نفسك قبل ما يحاسبك ربنا , ده اللى أقدر أقولها لك علشان توفى حق

ربنا.

أنا حق ولى أمر القتيل ده واجب لقبول التوبه!!

مد أیده المره دی علشان یسلم علیا , سلم علیا بسرعه ومشی!!!

نادیت علی مستر أکس قبل مايمشى مع الشيخ وقولتله:

آخر طلب ليا!!!

قالی:

أیه عایز شیخ تانى !!؟

قولتله:

لا عایز حضرتك توصل لاهالی روز وعدنان وبكرالحسينى..

قالی:

أنسى یاصمد انت المفروض میت وأستحاله أخلیك تقابل أهالی الناس دی!!!

قولتله:

أدى عنوانیهم للواد منصور أکید هیخرج من السجن فى یوم , اطلب منه یروحلهم

علی أنه أبنى وخلیه یطلب منهم السماح والعفو یمكن یقبلوه.

سکت شویه وقالی:

ماشى یاصمد هعتبره آخر طلب لیک قبل ماتموت!!

.....
أستغربت لما لقیته أبو برنیطه داخل علیا الزنزانه بعدها بأسبوع!!

قالى وهو مندهش وده انطباع جديد شوفته على وشه:

أنا عاجز عن الكلام!!!!

قولتله وأنا ملهوف:

أيه وافقوا يسامحوني بسرعه كده!!!!

قالى:

لا ... مالمش أهل أصلا , روز كنديه مالهاش أب وأم أو بمعنى أصح متربيه فى ملجأ ايتام فى

كندا , بكر المحامى مكانش متجوز كان عايش بطوله .. عدنان أبوه وأمه ماتوا حتى أخوه

الوحيد قتله بنفسه!!!

حتى قيصر اللى أجرت عدنان يقتله , محدش يعرفله أب ومالوش أخوات وأمه نرجس ماتت من

يجى 6 سنين , واخوك ملوش غيرك!!!

بوسته من برنيطته فقالى:

بس برده مش هتتفعلك توبه يا صمد!!

قولتله:

ليه كده يامستر أكس ماتقفلهاش فى وشى!!

قالى وهو بيظبط برنيطته ويحضر نفسه أنه يمشى:

الوداع يا صمد!!!

.....

عدى يومين وانا فى زنانتى مستنى الموت , بدأت أحس بأعراض شبه أعراض المرض بتاع

أخويا!!

كنت بدخل الحمام كتير وساعات مكنتش بمسك نفسى , وأعملها على روحى , عرفت أنى

فاضلى شهر قليلة قبل ما أموت...

طلبت كشكول وقلم , فلبوا طلبى.

قعدت فى زنانتى مستنى موتى وقررت أحاسب نفسى قبل ما يحاسبنى ربنا , فكتبت كل حاجه

غلط عملتها زى ماقلى الشيخ , كتبت.....

أنا صمد عندى 45 سنه عشت منهم عشر سنين بخدم أخويا الكبير غالى بع.....

خلصت كتابه وقريت كل اللى كتبتة ... كل ماقرأ صفحه أكرهنى اكثر.. أدأيه انا بنى آدم

قدر!!! وأستاهل كل اللى جوالى وأستهال عقاب ربنا ليا بمرض أخويا!!!

بكيت وبكيت وبكيت وأنا بستغفر ربنا لانى عارف أنه عقابه ليا هيبقى كبير ... عاقبنى و لعنى

فى الدنيا , وعقابه فى الاخره هيكون أشد.....

حسيت ان روحى بتتسحب وان دى اخر ليلة ليا ... نمت وانا حاضن كشكول ذنوبى وعامل

حمام على نفسى والدموع فى عيني!!!!

.....

صحيت تانى يوم لقيت نفسي كويس !!!, وبطلت أعمل حمام على نفسي , أياه ده انا خفيت!!!

ربنا غفرلى ؟!!!

ولا ده كان أسهال عادى من أكل السجن!!

أكل السجن!!!

أنا بقالى يومين مباكش ومحدث بيفتح عليا باب الززانة!!

خبطت على باب الززانة , وبصيت من القضبان مالقتش حد واقف بره الززانة!!

قعدت أنادى محدش رد عليا !!! بخبط على الباب لقيته مفتوح!!!!!!

خرجت من باب الززانة , لقيت طرقة صغيره , وأوضتين تانيين , ببص من قضبان أول

أوضه لقيت الواد منصور نايم على السرير , نديتله وزقيت باب الززانة لقيته مفتوح!!!

قالى وهو مذهول:

صمد..... أياه اللى جابك هنا !!! , أنت هتهربنا من السجن كمان!!!!

سمعنا حركة رجلين فى الأوضه التالته و بصينا لقيناه الواد أبو نضاره.... زقيت باب الززانة

بتاعته , فلقيتها اتفتحت برضه...

مشينا فى الطرقة احنا التلاته , وطلعنا بره الطرقة لقينا نفسنا فى بيت عادى!!

والزنازين اللى كنا فيها ديكور , طلعنا بره البيت لقينا نفسنا فى الصحرا!!!!

وقعت على الأرض وانا فى هيسيترية ضحك , ومش عارف أيه اللى بيحصل!!!
الموضوع مش هيخرج بره حاجتين أما مستر أكس نصب على الكل وكت بالكاليفونيوم!!
أو أدانى فرصه تانيه بعد ماهربنى من مستشفى السجن!!!
ميهمنيش مين مستر أكس... ولا دورت على تفسير للى بيحصل , اللى يهمنى أنى لسه
عائش!!!!

وربنا أدانى فرصه أخبره , وقررت أستغلها صح المره دى.
العيال جمبى كانوا فرحانين أنهم مش فى السجن....

.....
روحنا عند الدايره مكان التسليم وحفرت وطلعت 5 انايبب كاليفورنيوم كنت مكرمهم... مهو انا
مش هطلع من المولد بلا حمص !!! حتى لو كنت هموت!!!
المره دى انا اللى خططت لعملية البيع , وجبت الكردى والرجاله يأمنونا وياخدوا حصتهم
,والحمد لله قدرنا نضرب 3 باسبورات ونطلع بره البلد .. وقسمت الفلوس بالعدل بينى وبين
منصور والواد أبو نضاره كريم تكنو ... وأكتفيت بنصيبي من الفلوس... علشان أثبت لنفسى أنى
اتغيرت

بقى اسمى الجديد عبد الغفار ... وقررت ان عبد الغفار دا يعيش حياته بيكفر عن ذنوب صمد
السفاح ... يمكن يبقى ليا توبه وتطهير..... .

